

聖母禱文疏解

No 332

聖母禱文疏解

天主降生一千九百十三年

江南主教姚 准


中華民國二年 上海土山灣活版



聖瑪利亞爲我等祈


序

余生平雅不好爲人作序文。恐不加褒美。無以悅作者之心。而言之失當。又遭旁觀竊議。必欲兩全其美。則亦事之所甚難。故每避其難。而不肯措辭。今爲聖母禱文疏解一書。樂誌數語於卷首者。深知俞君素尙謙實。決不借重夫譽詞以傳其書。余亦不必過加推許。以博其歡。惟實事求是。以告人曰。俞君伯祿。以公餘之暇。運清顯之筆。裒集前賢




往聖之佳著。譯爲華文。成此善本。俾有志敬慕聖母。效法聖母。仰賴聖母者。得識禱文之真詮。而玩索體味之。以獲實益。我教中人。安得不各置一編。以爲圭臬耶。耶穌會司鐸蔣升邑虛

中華民國元年十月




自序

聖母禱文。西國又稱老來德禱文。老來德地名在意大利亞。聖母生時所居之室。本在納匝肋者。於一千二百九十餘年。靈遷於此。四方來朝者。恒不乏人。相傳初時附近信友。於此聖處。每逢瞻禮七。恭唱禱文。由此而遍傳普世。故名老來德禱文。是經讚頌聖母之德位。稱呼聖母之名號。懇求聖母之恩惠。列舉靡遺。揭明若覩。洵爲尊敬聖母之善



法。祈禱聖母之約言。故聖教會早已准定。恒珍之。在他經右。勸人虔誦。并禁主教修士擅自損益。又頒大赦。令人向慕。信友凡虔誠誦之者。每次得三百日大赦。又凡日誦不輟者。於聖母始胎。聖誕。領報。獻堂。升天。瞻禮。告解。領聖體。拜聖堂。按教皇意。求天主。可得一全大赦。前教皇良第十三。更深鄭重。勸人加念於玫瑰經之後。余意教友中。樂誦是經者固多。而能體味其意。備收神益者。或鮮。爰由



聖師利高烈。賢士藹度雅巴爾。得祺雅滿等所著。摘錄精義。譯成華文。逐句繹其意。推其訓。結以求。而論及聖母之高位貞德。權能仁慈。及爲人急需之恩寵。緊要之事功等。更不厭重覆。婉轉提明。每篇可資行默想。誦作聖書。翻閱之後。意念存心。則日常念此禱文。亦必更有趣味。易沾實益。爰冀誦是書者。重其意。而畧其詞。體於內。而行於外。或於省慈之道。救靈之工。得一隅之助焉。幸甚。



聖母禱文疏解... 序

六

天主降生一千九百十二年十月耶穌會司鐸

濱俞伯祿識



聖母禱文緒言

一歷史 聖母禱文中稱讚聖母。呼求聖母諸名號。概不自後代始也。天主聖母。寵愛之母。可敬可頌者貞女等句。不啻出自天神嘉俾額爾及聖婦依撒伯爾之口。聖瑪利亞可愛者母等語。耶穌聖若瑟在世時。亦必日常呼誦。及後聖教創始。宗徒到處傳揚聖母敬禮聖母。卽有祝禱聖母之稱呼。先聖先師於講道著說中。頗多類是之尊號。散見於各集。後人彙聚成篇。成今日禱文之式。似此聯綴成章。含蓄多意。再三叩禱之經文。始盛行於聖教第十二世。至古之聖母禱文。今日尙有存者。卽頒行於此時。想此經必逐漸彙成。不出一人之手。故不傳作者姓氏。自十二世自十六世間。初出諸禱文。類皆詞意沉長。複雜無序。後經名人賢士。次第改良之下。詞句簡短。意想豐足。不繁複。有層序。易於誦唱。




者。漸爲大衆歡迎。而成爲公文矣。十六世以前。教友誦禱諸經。聖教概不准定明文。任憑各自傳述。惟老肋德爲朝拜聖母名勝之區。四方來謁者。實繁有徒。該堂習誦之聖母禱文。遂漸傳佈普世。而其餘諸式。不久自行廢止。一千五百八十七年。眞福加尼。始將勞肋德禱文印行於公教日課袖珍內。教皇西斯德第五見之。大爲褒美。然未禁別種禱文。至一千六百零一年。教皇克肋孟第八。飭禮部出諭。嚴禁各種私著新式禱文。而准定現行之聖母禱文。由此一諭。而知此經內所寓超性奧理。繕靈聖訓。均蒙批准。定無錯誤。此後雖復增加幾句。然已視爲定式。傳誦普世。不再更變矣。

二總意 是經包括道理最豐富。爲聖母極榮譽。爲人靈極甘怡。恐於亞物而後。可算爲聖母經中至完美。至通行之經。然多誦不若善誦爲尤美。悟其意。玩



其味。言由心出。自然景仰。孺慕。依恃。懇求。奉獻。效法等情。觸景而生。隨詞而起。乃爲善誦此經矣。聖母禱文總意。啟口先念天主矜憐我等五句。乃諸祈禱神工之近備。卽先認己爲卑賤罪犯。依聖保祿之訓。人不能由己發一善念。故欲稱讚聖母。宜先求主矜憐。淨我唇。潔我心。遂卽激發信德。崇拜天主聖三。憶聖母爲聖父之愛女。聖子之眞母。聖神之潔配。先由其轉禱聖三。寵錫默廬。乃能出言適當。可蒙俯納。此爲禱文之叙引。堂皇正大。宛若示人宜鄭重其事。不可輕忽者云。繼呼聖母之名。懇其代禱。若爲全禱文之總題。以後諸般稱頌徽號之歸向。接以天主聖母。諸童身之聖童身二句。乃揭出聖母兩大特恩。爲其餘恩寵之原。所以被舉於諸受造之上者。隨繼以母之尊號十一。貞女之尊號六。俱由首兩句推出。旣爲天主之母。亦爲衆人之母。滿被聖寵。極美極善。貞潔絕



倫。忠能無比。將能啟人仰慕。動人依靠諸詞。陳列目前。待人玩味。第三等稱呼稍雜。乃取聖經上形物之喻。表揚聖母之德修尊美。使人易於領悟。又特求之於身靈憂患之中。呼爲聖教合會之輔佑。卒若引人面見聖母。於天堂高座。榮福之中。爲諸天神聖人之元后。末兩句。一頌聖母無原罪之特恩。一訓人念玫瑰經。敬求聖母之善法。旣於聖母足下。備述衷情之後。復迴向耶穌基利斯督。除免世罪天主之羔羊。求赦允矜憐我等。因之而始。亦賴其而終。蓋按聖教會公共意見。當因聖母而歸向耶穌。因耶穌而歸向天主也。由此畧意。足見聖母禱文之美意妙詞。多不勝述。故諸聖賢皆特別珍重。聖教會早行准定。又頒大赦。令人頻誦不怠。

三念法 至論如何念法。倘數人公誦或同唱也。則一呼一應。循序徐前。各尋



其味。互相祝禱。彼此觀感。能將人之熱情。補己之疏忽。爲益莫大於此。倘各人私誦也。則因每句饒有趣旨。可分拆。可停頓。句句如火箭。由人口射出。直中母心。言言如騰香。禱聲上達。恩寵下頒。又因禱文中。聯貫共數十句。故若一句不悟其意。無味可尋。可以別句繼之。動情適意之句。不妨連誦幾聲。再三體會。多次呼求。一句分心錯過。必有幾句善念。此句不足動聖母之心。復以他句催之。每句意義。雖不無分別。前後有序。然總示人聖母之尊德仁能。啟人敬禮之意。依求之情。此意此情。透露於每句之中。連誦之下。自覺感於悟。起於心。其餘善念好志。嘉言懿行。由自逐漸發生。待藏天府。故是經可謂敬母之真諦。救靈之寶訣。奉勸普世同胞信友。三致意焉。




聖母禱文疏解... 目錄

聖母禱文疏解目錄

天主矜憐我等
基利斯督矜憐我等
天主矜憐我等
基利斯督俯聽我等
基利斯督垂允我等
在天主父者矜憐我等
贖世天主子者矜憐我等
聖神天主者矜憐我等
三位一體天主者矜憐我等
聖瑪利亞爲我等祈
天主聖母爲我等祈
童身之聖童身者爲我等祈

見一張
見四張
見八張
見十二張
見十五張
見十八張
見二十一張
見二十四張
見二十七張
見三十張
見三十三張
見三十六張




基利斯督之母爲我等祈
天主寵愛之母爲我等祈
至潔之母爲我等祈
至貞之母爲我等祈
無損者母爲我等祈
無玷者母爲我等祈
可愛者母爲我等祈
可奇者母爲我等祈
善導之母爲我等祈
造物之母爲我等祈
救世之母爲我等祈
極智者貞女爲我等祈
可敬者貞女爲我等祈

聖母禱文疏解… 目錄

見三十九張
見四十二張
見四十五張
見四十八張
見五十一張
見五十四張
見五十七張
見六十張
見六十三張
見六十七張
見七十張
見七十三張
見七十七張

十三



聖母禱文疏解… 目錄

可頌者貞女爲我等祈
大能者貞女爲我等祈
寬仁者貞女爲我等祈
大忠者貞女爲我等祈
義德之鏡爲我等祈
上智之座爲我等祈
我樂之緣爲我等祈
妙神之器爲我等祈
可崇之器爲我等祈
聖情大器爲我等祈
玄義玫瑰爲我等祈
達味敵樓爲我等祈
象牙寶塔爲我等祈

十四

見八十張
見八十四張
見八十七張
見九十張
見九十三張
見九十六張
見一百張
見一百零四張
見一百零七張
見一百十張
見一百十三張
見一百十六張
見一百十九張



黃金之殿爲我等祈
結約之匱爲我等祈
上天之門爲我等祈
曉明之星爲我等祈
病人之痊爲我等祈
罪人之托爲我等祈
憂苦之慰爲我等祈
進教之佑爲我等祈
諸天神之后爲我等祈
諸聖祖之后爲我等祈
諸先知之后爲我等祈
諸宗徒之后爲我等祈
諸爲義致命之后爲我等祈

見一百二十二張
見一百二十五張
見一百二十八張
見一百三十二張
見一百三十五張
見一百三十八張
見一百四十二張
見一百四十六張
見一百四十九張
見一百五十三張
見一百五十七張
見一百六十張
見一百六十四張



聖母禱文疏解... 目錄

諸精修之后爲我等祈
諸童身之后爲我等祈
諸聖人之后爲我等祈
無原罪始胎者后爲我等祈
聖玫瑰經之后爲我等祈
除免世罪天主羔羊者主赦我等
除免世罪天主羔羊者主允我等
除免世罪天主羔羊者主憐我等

十六

見一百六十七張
見一百七十張
見一百七十三張
見一百七十七張
見一百八十張
見一百八十三張
見一百八十七張
見一百九十一張


聖母禱文疏解

天主矜憐我等

聖保祿宗徒曰。諸事由主而來。主皆爲己而造。是以惟主當受榮光於世。聖教會以天主矜憐我等一句。冠聖母禱文之首。訓人祈求聖母之前。先該呼號天主。蓋諸受造之物。卽尊如聖母。較之天主。亦如烏有。非主造之不能自成。所具諸美。無非由主而得。聖母所以能扶佑吾人。亦爲主之恩賜。終當歸功於主。惟主爲諸權能恩寵之源。其尊高無限。其本性自有。一無所需。其餘諸物。皆賴其生養保存。惟主自有萬福。永生永王。全能全智全善。惟主爲萬物之根源。終向吾儕灰土之人。不堪與主晤語。敢不謙恭敬畏哉。

聖教會欲人啟口先呼天主矜憐。亦以吾人在世。患難至多且深。實爲可憐。外

面之疾病災殃。內心之憂愁憎厭。明悟之昏迷。私慾之牽繞。欲爲善去惡而屢覺力弱不足。本性既偏於惡。又多世俗邪魔之誘弄。無時得脫陷罪之險。喪靈之危。噫。人生斯世。眞爲可憐。聖女德肋撒曰。主未死以前。我之永福。終不安妥。嗟此苦命。何不速終。阻我早享眞福者。非汝而何。今姑依主聖意。保汝養汝。切勿無良害我。主乎。我謫戍之時。何其久也。雖云以今世之苦。市永遠之福。爲時不論如何久長。終算爲暫。然而一息未終。恒有犯罪之險堪慮。居此景況。雖一日半時。亦覺悠久而難當。昔宗徒一日渡海。風浪大作。舟將覆溺。急呼耶穌曰。主速施救。行將亡矣。吾人亦當常同聖教會呼號曰。天主矜憐我等。不僅出諸口。然當深心體會。實覺困苦叢集。急須主憐。并知主無限仁慈。求無不允。爰跪伏於至尊天主之前。如手無一錢之乞丐。如不勝痛苦之病夫。如覆舟及溺之



人。向主哀呼曰。

祝言 自生自有。至尊至貴之主。懇從天朝寶座之上。俯聽我哀禱求救之聲。噫。爾爲全能至慈之主。我深信無疑。我知在爾寶座之旁。有一仁慈之母。是母也。汝願普世諸人光榮之。一如彼之光榮汝矣。是母也。將厥子女讚揚之聲。化爲恩寵之露。由上沛下矣。是母也。恒爲吾人轉求爾佑。今與之共禱曰。天主矜憐我等。

基利斯督矜憐我等

人靈縱覺艱苦之甚。非主矜憐。終不能保己常生。然知天主無限尊高。雖欲求之。未免驚畏。聖教會知其然。故接此一句。若將人之於主。其間無窮之懸隔。畧爲掩藏而不言。引人赴耶穌基利斯督主與人間之中保之前。以啟人依望之心。蓋吾儕有信德之教友。依聖經之訓。知耶穌基利斯督係天主聖子。降生爲人。除免世罪。天主之羔羊。曾受諸般窘難者。除罪過之外。悉與人同。其在世時。所以一如窮人者。欲親歷苦境。以憫憐人也。然耶穌基利斯督亦係天主。爲天主之聖子。吾人之司祭。今在天執天國之鑰。權司啟納。故聖教會訓人求其矜憐。是以此一句。而去人冒昧之望。啟人依恃之心。法莫善焉。蓋汝若深信非耶穌之苦難聖死。不能挽主降罰之案。必不敢冒望主慈。肆惡無憚。又汝若深信

天主聖父。若是愛世。至付己獨一聖子於世。使衆人信之。賴以免死。而得常生。則犯罪雖多且重。必不致失望主赦矣。

惜夫吾人。每以此信從耶穌之恩。視之太輕。不知實爲超越之寵。不但依人本性之力。無從可得。卽明悟亦不能想及。愛欲中亦無此奢願。無此信德者。終不能得常生。聖保祿宗徒云。無信德不能悅主。主所不悅者。豈能升天享受永福哉。耶穌向聖父云。永遠之生命。在識汝爲獨一真主。并汝所遣之耶穌基利斯督。卽於斯世。亦惟此信德。爲真實之生命。耶穌云。聽我語而信從遣我者。由死而得生命。故不信耶穌者。雖生實死。蓋爲邪魔之奴婢。浮沉於黑暗之中。不知爲人之本分。人生之終向。如舟無舵師管駕。漂蕩於汪洋大海之中。居其中者。惟有憂傷哀哭。待死而已。不信從耶穌者亦然。遇苦難而無安慰。受內外諸誘。

而無力抵禦。不知耶穌所訓甘飴真實之道。不識耶穌所立成全之表。耶穌無限之功。不能罄及。耶穌真實之約。不得聆聞。噫。外教之人。何可憐之甚哉。吾儕教友。幸得聖信之光。不當感激無涯耶。

祝言 吾主耶穌。當欽當崇之大司祭。救贖人類無價之犧牲。爾賜我信德之恩。我實感謝不盡。讚嘆無言。吾主耶穌。汝既啟我於先。毋許我廢於半途。未抵成全之域而止。懇再增益我信。輔以愛德而行。吾儕果爲犯罪之人。沒良之輩。然非汝弟兄乎。汝爲救贖吾人。流盡聖血而不惜。尙有何恩吝錫哉。請視我與爾公共之母。今我在患難中。奔赴厥懷。而爾忍擯拒之乎。昔撒落滿王謂厥母伯撒滿曰。母。請示所欲。不論何事。我總不却。今聖母之聲於汝臺前。不更有力乎。昔汝在世。止需聖母一語。卽顯行靈跡。今爲我轉求。而汝能不之允哉。吾儕

有聖母之轉禱。知汝義怒之劍。定將變爲聖愛之火鎗矣。爲此滿心仰望聖母。
向汝呼號曰。基利斯督矜憐我等。

聖母禱文疏解 ..

基利斯督矜憐我等



天主矜憐我等


聖教會既見吾人以信托耶穌之思。心寬望切。雖聞天主之尊名。不致驚惶退縮。乃囑我再呼曰。天主矜憐我等。夫人有耶穌基利斯督。真主真人無限之勞。置在目前。作爲資助。似不必過畏主之尊威。而如亞當犯罪後。驚懼若瘋。隱於深林。冀逃主面矣。噫。天主聖父。愛人若此之甚。至遣已聖子降世。拔人爲其義子。我何不賴其所愛之子。因我中保耶穌之名。欣然趨至天主之前。呼曰。父。夫此稱呼。真爲主之特賜。人之大榮。吾儕微賤罪犯。祇當受主斥罰。而主今不但不罰。反遣已聖子。親來救贖。提拔吾人爲義子。聖若望宗徒曰。天主聖父欲吾人稱爲天主子。并實爲天主子。自今而後。我知聖父之盛愛矣。我知耶穌救贖之功效矣。將分當下獄之人。直舉爲天主之子。斯真莫名之妙事。非主其

誰能之。

人於領洗時。所得天主義子之高位。往往不知尊重愛惜。或屢犯小罪以賤褻之。或犯一重罪而喪失之。雖然。不論如何。終不能絕滅救世主所立之功。所遺之法。用以復人於榮光之位也。蓋耶穌基利斯督以終生苦辱。死於十字架之寶庫。交於我手。宛似不能失落之產業。倘我一息尙存。儘可恃以得主要寵。救靈升天。耶穌云。以我名求聖父。求無不得。噫。天主加於教友之榮位恩寵德能。何其大哉。吾儕信此真理者。可不感激無盡。同大聖若伯曰。主人爲何物。而汝優待之若此。吾儕赴主臺前禱告時。雖不能不驚嘆主之崇恩。肯降己尊威。俯聽微賤罪人。而不擯棄。然亦當寬我心。放我膽。如孝子於慈父前。盡道衷情。毫無隱諱。蓋我旣與耶穌合而爲一。耶穌與我共呼主憐。能不見聽乎。吾儕之聲。

附於中保耶穌之聲。非復如人聲之柔弱穢濁。不足動主傾聽。然若變爲天主之聲。清亮聖善。不能不悅聖父之耳。而盡得所求也。

祝言 天主因爾無窮聖愛。遣聖子降生。爲人中保。我今賴其無限功勳。在爾臺前。訴我困苦。懇求矜憐。吾儕因耶穌之故。非僅爲汝之僕役。亦爲汝之義子。與耶穌同爲嗣子矣。耶穌之血。爲我升天之價。早已付訖。我爲彼弟。彼爲我兄。皆當享受汝產於天國。是故我今全心仰望。至汝恩寵座下。求汝憐視我。一如憐視耶穌無異。然耶穌毫無急難。而我則內外多苦。天主。今茲非我求汝。乃吾等之兄耶穌以我心口。向汝呼曰。矜憐我等。且汝之愛女。吾儕之慈母瑪利亞。亦向汝云。我與人爲骨肉之親。耶穌由我淨血而生。耶穌旣以復生救人永死。旣以貞潔。去人污濁。旣以十字聖架。攻敗邪魔。豈可任其沉於世俗。羈於魔手。



哉。吾儕復因救世耶穌之名。同聖母瑪利亞籲呼曰。天主矜憐我等。

聖母禱文疏解... 天主矜憐我等

基利斯督俯聽我等


我之心。愈結於耶穌之心。我之聲。愈附於耶穌之聲。我之祝禱。愈如馨香之祭。能升至主前而無阻。聖教會更欲益人信望耶穌之情。并與其至聖之心。契合無間。故於此又囑人求曰。基利斯督俯聽我等。夫耶穌之轉達。最爲有效。聖保祿曰。誰因耶穌而赴就天主者。無不獲救。豈耶穌不願爲人代禱乎。當知其於受難前夕。向聖父云。我不祇爲宗徒。亦爲將來信從我之諸人祈求。是故吾儕懇其俯聽。非因疑其不聞人禱。不聆其所愛者之聲。然求其特加恩寵。如父母聽己子女之禱告。不以吾儕之罪。而稍減慈衷。乃求與主聖心。情意相合。好惡相同。乃求與主往來交際。親密難言。俾天神亦見而驚奇。噫。靈有天主寵愛者。福何如哉。怡何如哉。與耶穌契合晤談。無異良友之與良友。淨配之與淨配。聖



經云。彼在我。我在彼。非以喻熱愛之靈向主之言乎。又曰。我攸愛者。汝聲悅樂我耳。非以表主向靈之語乎。

惜人於事主之途。每冷淡疎忽。不能至此親密之境。屢於主外分心務他。而於小事中。隨從己好。不肯奮然全愜主心。夫至尊至貴之主。汝當全心愛之。一意事之。而竟忽畧至此。無怪其不與汝交契如友也。雖然。亦不宜因此畏蕙失望。倘以本性柔弱。未能如諸特寵之靈。與主密邇多情。至少當自勉勵。生死不失聖寵。與主絕交。汝若肯力避犯罪諸端。不但不願離背天主。并不忍稍逆其心。自必與主日親一日。心心相印。念念不違。直至死後。永遠再不能離間。樂何如之。

祝言 吁。耶穌。汝爲真實之友。見有人心勿爲物慾所蔽者。恒以恩情充足之。



無所不至。望爾之盛愛。顯揚於世。如於天上無異。夫嘗汝甘飴。沐汝特寵之靈。必將與上天神聖。嘆揚不止。卽未曾親嘗此味。止自遠見之而奇異者。亦當知恩自足。謝汝俯聽之恩。吁。純善至可愛之耶穌。我今若聞汝自天發聲云。我已聽汝禱。速將憐視。汝勿畏也。噫。主乎。以我一呼一吸。盡爲哀號之聲。求賜勿陷於罪。勿失汝寵。倘不幸而值此大禍。今先求汝。賜我犯後速行悔改。毋死於罪。此固莫大之恩。然有我等之母瑪利亞。代爲祈禱。定獲無疑。求爾爲聖母之故。不施義怒。不罰我負恩之罪。求爾以聖母之貞潔。賜我遠離諸凡罪惡。求爾以聖母之轉禱。救我於神形諸患。望以聖母之佑。不猝然未備而死。基利斯督。今復以爾我公共之母。求爾俯聽。賜我生於爾。死於爾。永不遠離爾。基利斯督俯聽我等。

基利斯督垂允我等

聖教會以一次呼求基利斯督俯聽爲未足。又囑人再呼基利斯督垂允我等。何哉。因基利斯督之名。最甘飴。最尊貴有力。呼之可邀寵佑。獲安慰。增勇力。三復之不厭。愈呼之。愈覺悅耳怡情。不可言喻。憶我人自元祖犯罪後。居此世界。憂苦頻仍。危險百出。豈可以呼此大能之名。求其垂救爲煩哉。聖經云。惟因此名之德能。人得救靈。又謂一聞耶穌之名。上天下地獄內。皆當屈膝。昔日宗徒及後代聖人。皆以耶穌基利斯督之名。顯多靈跡。聖教會於聖事中。亦以此名。行諸奇妙之功。於人靈魂之上。故凡深信明知此理者。莫不以頻呼耶穌基利斯督之名爲樂。愛患中呼之以得救慰。黑暗中呼之以邀光照。遇誘惑呼之以獲主神力。易於勝仇。勇於爲善。妥救己靈。是名也。聖歌譬如珍寶之油。聖伯



爾納多申解曰。如油之發明光。養生命。增力量。減苦痛。脫失望之險者也。或謂上文俯聽我等一句。至爲悅耳。再三誦之不厭。爲何欲易此垂允兩字也。不知聖教會欲以此兩字。明示我人。有時耶穌雖若俯聽。然不卽允所求。或以增我信望。或以激我熱愛。或以加我功德。而人每遇此等試難。易於灰心失望。以爲耶穌不聽我求。故聖教會囑加此句。若強迫耶穌速允所願也。然倘天主上智。欲試我恒心與否。所求者仍未見應允。更當懇求恒禱之恩。夫失望天主之仁慈。不恃耶穌之功勳。妄想其不踐所許。定爲辱主之罪。然我若以求而未得。卽噤口灰心。不再祈禱。非犯此罪類乎。當知恒心善禱。雖若不動主慈。不覺垂允。已爲事主至善之工。信主無窮誠善。而不之疑。聽主上智措置而不之究。恃耶穌無限之功。轉禱之能。雖不覺其效。而仍不失望。非至爲悅主之事乎。



祝言 吁。耶穌。依聖若望。宗徒之言。爾在聖父前爲吾人之中保。求爾賜我恒禱之寵。雖不見允。亦終不輟。耶穌乎。我若無汝寵佑。卽祇欲呼汝聖名。亦所不能。望爾以全能之寵。賜我熱切祈求。愈不見效。叩之愈急。至死不息。聖經云。汝慈良待人。如母雞之護字其雛。我能否滿心依望。赴汝臺前。盡訴各般困苦。一切願欲乎。今再以爾母之轉禱。賜我心常結合汝心。永不離背。我之祈求常經聖母之手。呈汝臺前。今懇視爾母之顏。賜我至終呼號曰。基利斯督垂允我等。




在天天主父者矜憐我等

吾儕既因以上諸求。深結於耶穌基利斯督。賴其無窮之功。可赴皇皇天主聖三之前。而無所恐懼。聖教會爰卽囑我先呼第一位曰。在天天主父者矜憐我等。在天云者。非謂天主本性非無所不在。充滿普世萬物也。昔達未聖王信愛勃發。喟然向主嘆曰。或於高天。或於深淵。或於海角。或於黑暗之中。或於明光之下。汝誠無所不在焉。天主之無所不在者。以其明悟無所不知。無所不見也。以其全能不論於何處。一有所欲。無不立就。一有不欲。卽歸烏有也。以其本性無窮無限。一無缺限。充溢萬有。無所不在也。聖經又云。吾儕之有。有於天主。行動生活。亦本於天主。天主在我周圍。在我內外。在我智識德能之中。在我本性本體之內。如玻璃之器被日光透徹。無一處不被光照。倘汝妄想天主遠居天



上深宮。世人祈禱之聲。難以上達。自謬自害極矣。吾儕厄。襁子孫。倘於此苦世。遠隔慈善之主。更將窮獨無告矣。然天主實在人中。比我之於我。更爲親密。有所急需。有所願望。不必勞心費力。一啟口。一舉念。即可邀主聽覽。獲主矜憐。幸何如之。


天主既無所不在。何以獨云在天乎。曰。以天上爲榮福之境。常生之域。天主於此發顯己之榮光。天神聖人於此享見天主本性。稱頌不已。福樂異常。非世人心思所能喻。人於斯世。不論有何懽樂。終不能全然快適。况概多困苦。外而疾病艱窘。內而悲傷愁悶。有所欲而不能得。有所惡而不能去者。比比然也。稱爲涕泣之谷。信乎不謬。是故吾人活於世上。無不慘哭苦泣。惟所受之苦。多寡不同耳。倘天主於人死後。祇許本性之福。尙將稱謝不遑。尋求無怠。况天主宏恩



大量。竟許人超性之福於天上。是福也。依聖保祿宗徒之言。人目所未見。耳所未聞。想像所不及。宛若拔人結合主之本性。享受其福。如此大恩。能不重視渴願乎。重視之。渴願之。自必欣勤奮勉以得之矣。今故真情切意。向主聖父曰。祝言 在天聖父。汝以聖子耶穌之功。已立我爲義子。召我得汝天國之產。再求啟我明悟。俾能稍知爲我所備者。係何等之榮光。快樂。富有。增我能力。將天堂賞報之思。勉我於世。嗜苦如飴。多多益善。以增天上之榮福。聖母瑪利亞。汝爲天主聖父之愛女。非死亡之女。乃生活之女。耶穌基利斯督生活之源。上天之樂。由汝而生。請爾於聖父前。爲我中保。導引我於升天之路。今再與爾同禱。曰。在天天主父者。矜憐我等。

贖世天主子者矜憐我等

聖教會接此一句。爲訓人憶念天主聖子。降生救贖之鴻恩奇效。今救贖之功。固已成就。罪惡之債。固已補償。然迴思天主聖子。與聖父一性一體。同爲眞主。自願抑己尊高。降生爲人。一生苦辱。至終死於十字架。而知救贖之價重矣。大矣。人之靈魂寶且貴矣。誠信此奧理者。孰不感恩罔盡。殫心竭力。妥救己靈。以全耶穌之功。增耶穌之光乎。自元祖犯罪後。吾儕應受永罰。若非無窮之補贖。永不能償主尊威。而得赦免。然誰能立無窮之功。以贖人罪哉。定非人類。亦非天神。因天神本性雖超越乎人。并於主前清潔多寵。究係有限之性。不能立無窮之功。以故若非天主聖子。親取人性。爲人補贖。別無他法。聖保祿云。耶穌甫入世。向主聖父曰。爾不欲犧牲祭獻。而與我肉體。我今來此。奉承爾命。卽將我



衆諸罪。置於己身。終生受苦。卒釘於十字架。以贖我等無良之人。

似此動心大道。不可輕忽錯過。請汝隨主聖寵默運。以明悟推想天主無窮慈愛。如汪洋大海之無邊無際。以愛欲激發衷情。謝主挽救之功。復還寵愛之生命。夫此寵愛。洵爲超性奇恩。將人靈結合於主。宛以主之生命通傳於人。使人活天上之命。聖保祿宗徒曰。寵愛爲永遠之生活。不其然乎。又當謝耶穌所定之聖事。俾未受此聖寵生命者。領之可以接受。已受者領之賴以保存增益。有此寵愛。而我之諸行。有奇妙之功。值天福之報。增永遠之榮。以此寵愛而行。事雖微賤。工雖頃刻。較諸萬世之富藏。與夫普世之人。恃本性之力。以千萬年勞苦所行之事。亦遠出無比焉。

祝言 天主聖子。我迴想汝救贖之功。聖血之效。惟有稱奇不止。難以領悟。聖

保祿謂汝愛我。過乎其分。洵爲不謬。我亦高聲呼嘆曰。汝之愛情高矣深矣。非人明悟所能喻。汝之功德至矣極矣。非人筆舌所能宣。汝之恩愛廣矣大矣。非人心思所能感。耶穌乎。人卽竭盡心力以愛汝。亦不能報汝之愛於萬一。汝爲吾儕之依望。吾儕之中保。汝之救贖雖已成於往昔。而其恩澤仍留於今茲。望勿以我等罪過。使汝救贖之功。徒然無益。汝之至寶聖血。恒呼於聖父之前。救此重價所贖之民。汝之母至聖瑪利亞。亦附汝而言曰。予爲斯民代禱。望主憐之。吁。耶穌乎。我今恃爾有求必應之母。向爾呼曰。贖世天主子者。矜憐我等。



聖神天主者矜憐我等

聖若望宗徒曰。天主愛也。雖愛情之功。爲天主聖三所共。然以聖神爲聖父聖子共發之愛。故特歸於聖神。耶穌謂尼各得陸曰。人非重生於水與聖神。不克進天國。依聖若望之訓。聖神之恩寵。猶如活水之河。流行於信者之心。聖保祿亦訓人曰。因聖神而天主之愛施散於我等之心。又曰。望天主以聖神之智識光照施發於爾等。又曰。聖神能新人身心。助人柔弱。代人呼求之聲。懇切難言。由此觀之。吾儕柔弱昏昧之人。不當懇求聖神之明光愛火。以照我幽暗。熱我心志乎。求其照我明悟。使能判事不循肉目。而循真智。堅我愛欲。使能不貪虛樂。而好真善。整我心思願欲言行。皆成爲超性之功夫。不愧爲天主之義子。真實之教友。



眞實教友。不當以非理之利樂。置於心。出諸口。惟以天主爲意念言行之終向。天堂爲趨赴之本鄉。救靈爲獨一之要務。卽享用世物。亦無非隨主聖意。爲主之故。終乃歸之於主。一心趨向天主。如磁針之直指南方。雖搖動之。使之別向。然不指南終不定也。外教人所想者。惟世間之榮利。所求者。惟肉身之嗜好。將靈魂永遠之利益。置而不顧。獨勞勞於瞬息之虛榮淫樂。哀哉。眞教友與外教人所爲者。每相同之事。所遇者多相似之景。然意念異。心志異。而所作之工。遂有天壤之別。於此爲天國永福之價。於彼爲地獄永火之柴。此有天主聖神之光照扶引。故所爲之事。皆超越本性。有益於天國。彼隨已壞之性。又聽魔俗之計。宜乎罪上加罪。終至陷於地獄而後已。我今伏求天主聖神。賜內外諸事。皆隨其默導。成爲超性之功。賜我不滅其恩照。不傷其慈心。堅意定志。至死敬聽。



聖母禱文疏解…

聖神天主者矜憐我等

二十六


聖神之指引。善用聖神之恩寵。今懇切向之求曰。

祝言 天主聖神。汝爲生命之源。愛德之炎。憂苦之慰。賜我於此險世。常能不偏不倚。遵行義德之路。良心清潔。信德真切。明智日增。愛情日熾。庶能於事主之途。時時上進。直至面見汝於天堂。享受義德之報。天主聖神。以爾淨配聖母瑪利亞之轉達。賜我心滿受恩寵。堪爲爾之宮殿。將我身靈五官三司。悉獻于爾。聽爾默運。今再以聖母之名。求爾曰。聖神天主者矜憐我等。

三位一體天主者矜憐我等

天主三位一體之理。雖奧妙難明。然爲聖教之根基。諸奇功妙寵之來由。故聖教會訓人分呼聖三後。續加一句曰。三位一體天主者矜憐我等。夫天主如何一體而兼三位。如何三位共屬一體。如何天主聖父自無原始。以認識己而生聖子。與聖子相愛。而共發聖神。如何聖父非聖子聖神。聖子非聖父聖神。聖神非聖父聖子。而共爲一性一體之天主。無大小先後之別。如此奧妙道理。人於斯世。止當堅信。不能明悉。亦不可深究。惟當認己明悟淺小。不能明達。謝主親自默啟。知天主之言。不能欺謬。深信無疑。又當忠心事主。庶望於天上。面見聖三。雖仍不能透徹其性體。自必認識之更明矣。


天主聖父。拔我爲其義子。天主聖子降生爲人。舉人之性。給於己性。天主聖神



以其寵愛。散給人靈。使人與主有莫名之通誼。我與天主聖三。有如此情誼。不當自重身分。稱此高位乎。天主既舉人至此極高之位。凡不關天主者。皆在人下。人既爲聖父之子。聖子之弟。聖神之殿。當自知尊重。非同凡類。一若王親國戚。不可流於凡俗。祝聖之物。不得視爲凡品也。

祝言 聖父聖子聖神。三位共爲一性一體之天主。我願爾獲光榮於無窮世。謝爾親示性體之奇妙。謝爾拔吾人類於超性之境。尙望後於天上。益將純全我性。肖似爾莫名之體。噫。思此莫大洪恩。尙何言哉。惟如先知熱肋米亞曰。主天主。我如嬰孩。不知言語。止有驚奇感嘆而已。卽至聖之母瑪利亞。亦驚訝不止曰。全能天主。大展德能於我。吾等今與聖母。同揚汝之廣大。拜汝爲萬有之原由終向。今因爾聖父之愛女。聖子之眞母。聖神之淨配。藉於受造中至純美。

至肖爾之聖母之轉禱。賜我至死不辱汝所加之高位。庶於天上。見爾妙體。享爾榮福於無窮世。三位一體天主者矜憐我等。



聖瑪利亞爲我等祈

耶穌聖名而後。瑪利亞之名。最爲尊貴。最爲甘飴。最有能力。故聖教會於呼求聖母之始。訓人先誦曰。聖瑪利亞爲我等祈。耶穌係吾人長兄。瑪到亞旣爲耶穌之母。亦爲吾等之母。深體耶穌之心。愛吾人類。愈於世母之愛其子女。故瑪利亞之名。卽爲我母之名。誰爲人子而不樂稱其母哉。由是呼瑪利亞之名。而孺慕之心。勃然起矣。瑪利亞聖名。解釋殊多。均有奧義。或釋之爲主母。蓋聖母產生耶穌。爲天主之母。位超神聖。轉禱之能。無欲不遂。萬彙均聽其命。或釋之爲明光。蓋義德之日。眞實之光。耶穌基利斯督。由聖母而生。且聖母貞潔謙順諸德。輝耀異常。轉照普世。遠出諸神聖之上。或解之爲海星。聖母德光昭著。導引世人避惡爲善。同登福樂之區。如行船者望海星而免涉迷津。又於此世海。

每昏暗無光。風浪並虐。覆舟可慮。呼求聖母之名。乃能撥雲霧而見青天。乘風破浪。直行無患矣。


聖母之名。本非如耶穌之名。自有無限德能。蓋聖母雖至尊至聖。究係人類。耶穌爲天主。人終不能與天主比也。然耶穌欲以聖母之名。顯己榮光。若將己名之德力。通於聖母之名。由是而瑪利亞聖名。亦能加人安慰。增人勇力矣。聖伯爾納多曰。於汝危險疑難憂苦之中。勿忘呼瑪利亞之名。倘瑪利亞之名。常在汝心。常在汝唇。無有差誤。失望顛覆。驚畏勞苦矣。聖經云。童女之名瑪利亞。是名也。何甘飴有味也。屢誦之而不覺其厭。聖母之名。亦如耶穌之名。能驅逐邪魔。聖伯爾納多曰。魔誘攻汝。速宜呼求瑪利亞救助。蓋聖母爲天主所許。踐踏魔頂之女。人每次呼其聖名。魔聞之。若天主昔日斥罰之言。一如霹靂之聲。重



震於耳。能不奔逃恐後哉。聖教會知聖母之代禱。最爲有驗。故教人稱呼聖母諸名號之後。常加爲我等祈一句。蓋耶穌聽從己母之求。無一勿允。人有聖母之轉禱。幸何如之。一日聖婦彼利日。大聞耶穌向聖母曰。我母。汝所欲之事。我無不允。又言其故曰。昔予在世。汝常遂我所欲。今爾在天。予亦終勿却汝所願。祝言 聖母瑪利亞。我代爾感謝天主。若是顯揚汝名於普世。吁。聖母。賜我能悟汝名之尊貴甘飴德能。而敬重依望。思念不忘。汝之名若青葱之阿里伐樹。果實纍纍。啟人垂涎。汝之名若藏香之寶器。芬芳撲鼻。舒人心慮。汝之名若嚴整之軍旅。邪魔不敢近前。吁。瑪利亞。耶穌之名而後。惟爾名爲我之安慰。我之能力。我之保障。我願此兩名常置諸心口。直至臨終。念念不忘。我今爲得此恩。與聖教會同呼曰。聖瑪利亞爲我等祈。

天主聖母爲我等祈


天下公論。母以子貴。瑪利亞爲天主降生之母。天主尊高無量。而瑪利亞之尊高可知矣。噫。由如達族之女。而爲天主之母。非莫名之奇妙乎。稱聖母爲天主之母。非以一言而遠勝諸榮名尊號乎。凡爲大聖之母者。人每稱頌之。以爲殊福。倘生一天神於世。定更令人起敬起羨。今瑪利亞爲天主之母。生天主聖子。於世。誰能悟其高位。讚之相稱哉。有信德之靈。不將同聖多瑪斯驚訝曰。天主之母之尊高。宛無限量。或與聖伯多祿達米盎嘆曰。似此高位之光輝。使吾儕相顧愕然。不能出聲。不敢舉目矣。天主之能無窮。不論爲何奇大之事。常能爲更奇更大者。然我謂天主雖全能。旣擢瑪利亞爲天主之母。不能使之更尊更高矣。蓋天主聖父旣與伊獨一己子爲子。不能有更尊更大之子。可以與之矣。原



聖母生耶穌。祇生人性。然因耶穌人性。初無本位。而結合主性。立於天主第二位。以天主之位爲本位。故聖母生耶穌。卽爲天主之母。其尊高無以復加矣。吾儕思此奧理。宜深信無疑。驚奇不止。稱揚天主全能上智之功。天主欲降生爲人。本不必從母而生。然天主上智以爲選一母親。由之而生。親爲人子。以救人類。是人中之一。代衆補償主義。更爲相稱。且以亞當厄襪。男女兩人。共敗後世子孫。故使男女兩類。同施補救之功。爲事更屬相宜。奇哉天主之無窮上智。選瑪利亞爲天主之母。產生救世耶穌。而男女兩類。俱有分於救贖之功。俱有光輝矣。然天主之寵恩。猶不止此也。尙建定聖體聖事。以廣垂降生之功。使領聖體者。得如聖母之懷孕耶穌。亦如天主聖子之結合人性。耶穌云。食我體。飲我血者。我在彼。彼在我。不與之親結如一乎。噫。似此鴻恩。本當熱我心志。激我

殺勇。而我反怠然從事。毫不動情。不宜懷慚無地乎。

祝言 聖母瑪利亞。我深幸能同聖教會。稱爾爲天主之母。依聖經之言。耶穌爲吾儕長兄。爲爾之長子。汝能用聖經之言云。造我者息於我懷。亦能學聖父。謂聖子曰。汝爲我子。我今日生汝。聖母。汝既爲天主之母。吾儕主之僕役。分當竭恭盡敬。頌爾愛爾。汝既爲天主之母。汝之權能。極其廣大。無有求於主而勿得之寵。且汝之求。有出命之義。耶穌若不得不從。今特懇爾賜我虔恭聖體。勤領聖體。能如爾結合聖子耶穌。活其生命。顯其光榮。乃可死後享見爾母子聖顏於天上。天主聖母爲我等祈。



童身之聖童身者爲我等祈

瑪利亞稱爲童身之聖童身。因無他人之表率。首發童貞之願。獻己身心於天主也。夫聖母如何珍重此願。聽其答天神之言可知矣。當天神告以將懷孕產生天主聖子時。聖母卽驚辭曰。我不識男。此事曷成。猶云。我甯辭主母尊位。保守童身。迨天神爲之解明。雖爲主母。無礙其貞。始肯應允。從可知聖母愛慕貞德。遠出諸童身之上。稱之爲童身之聖童身。不亦宜乎。聖經以聖母比麗利亞花。生於棘刺之中。麗利亞西文。花類玉簪。爲清貞之像。故於聖母像上。亦畫此花。一枝三朶。表明聖母產前產時產後。常爲童身。麗利亞極潔白極馨香。表聖母貞淨芬芳。遠勝其餘童身。生於棘刺中者。蓋如第阿尼削沙爾德解云。他貞女皆似棘刺。難以持己。易動人淫。聖母不然。不獨自造貞德極詣。更能引人潔



己修身。聖盎博羅削曰。聖母在生時。見之者莫不頓起貞心云。

予靈。汝知貞德之寶貴乎。耶穌於講道時。屢推重守貞者之地位。又云。心淨者乃真福。爲其將見天主也。凡人身心愈淨者。耶穌愈樂與之往來。聖經云。天主樂居於麗利亞花中。今見聖母之貞操。遠超神聖之上。宜乎永福之王。見而悅之。自天降顧。不肯離去。我今反求諸己。亦密隨天主之羔羊乎。我心亦爲天主樂居之宮殿乎。噫。恐以耳目過縱。太璞不完。身心不慎。白絲屢染。意念言行間。有多事不敢行之于人前者。獨於耶穌聖母之前。爲之而不覺羞愧。惜哉。自今以後。宜堅意定志。凡有礙貞潔諸端。一意斷絕。雖小不忽。持身如耶穌之肢體。勿致稍受污辱。憶主無所不在。不論居何景況。頃刻不敢縱肆。若是庶無不可對主聖目之事矣。



祝言 吁。童身之聖童身瑪利亞。汝爲貞潔之表率。汝爲獨一之純鴿。西宛諸女。皆見而生羨。稱爾真福。噫。汝之德表。何其有能也。無數之人。棄斯世之榮樂。獻身心於天主。甯苦辱終身。或捨身致命。以守貞潔。非以汝導之於先乎。非爾誰能教人修此貞德。度天神之命。有身如無身乎。聖母。亦求賜我效爾清貞。矢志正心修身。勿使白圭有玷。乃可望與主爲友。永隨無玷羔羊於天上。童身之聖童身者爲我等祈。

基利斯督之母爲我等祈

稱瑪利亞爲天主之母。固已一言而該聖母之尊高。然欲悟其奧旨。須先明天主無窮無限。而人終不能透悉。故聖教會呼聖母爲天主之母以外。復教人加基利斯督之母一句。乃以淺顯者言之。俾人便於領會。子之才德益大。施惠益多。爲之母者必更受人崇拜愛慕。今瑪利亞爲基利斯督之母。基利斯督僅以其人性而論。非德能美善。獨造其極者乎。聖保祿宗徒曰。天主聖智之寶藏。盡蘊於厥躬。故基利斯督之良善謙忍。仁愛諸德。無不遠逾神聖之上。宏量厚情。無所不至。致爲人捨己生命而勿惜。將邪魔之奴婢。拔爲天主之子女。疊加寵錫。宣播訓言。又立定聖教會。使己仁恩德表。得以廣傳久遠。

試觀聖教會之德化。補刑法所不及禁。啟性理所不能明。默感潛孚。循循善誘。



將頽靡殘虐之風。如購奴殘嬰。納姬溺邪等事。掃除殆盡。化爲清潔醇善之俗。非因基利斯督而施乎。聖教會所加神形諸惠。所行內外諸功。非由基利斯督而來乎。是故聖母卽非天主之母。其子基利斯督卽非天主。祇爲一大聖人。大恩人。人已當愛敬尊榮之不止矣。更以超性之事思之。非基利斯督救贖之功。元祖犯罪而後。人終不能得主寵愛。終不能立功升天。亦不能得主寵佑。去惡從善。無基利斯督。主與人間終不能有慈愛之交際。終無聖信之光。永福之望。吾儕皆進基利斯督之教。蒙其恩惠甚多。靜言思之。自應衷情勃發。感恩罔盡。而今反背其表。忘其道。犯其誠。罪之辱之。沒良至矣。今我倘非鐵石心腸。不當痛恨前非。報恩於將來乎。

祝言 聖母。吾儕之大恩人卽爾聖子。汝能向之云。汝爲我子。我曾懷汝生汝




養汝憶聖母當汝以襁褓包裹耶穌之時。或取入懷中。捧抱之。乳飲之之際。所有欽崇忻感。驚訝愛慕。奉事倚靠等情。定非筆舌所能宣。聖經所云。我攸愛者在我。息於我懷兩句。亦不足盡述汝衷情。自後基利斯督幼而壯。或在厄日多。或居納匝肋。與汝周旋晉接。內外無間。三十年如一日。其中親愛之誼。欽事之景。亦非吾人所能喻。今因爾母子相愛之情。賜我心亦熱愛基利斯督。報其無數之惠。再勿許我辜恩負義。得罪此大恩主。聖母。汝於耶穌之前。無有欲而勿得者。求爾賜我此寵。基利斯督之母。爲我等祈。

天主寵愛之母爲我等祈

昔天神嘉俾額爾奉天主聖三之命。來報降生奧事。語聖母曰。亞物。滿被聖寵者。夫寵愛乃天主超性神恩。在人靈魂。爲其超性之生命。肖似天主妙體。有與於主性。難以言喻。滿被者充盈之意。天主願人聖寵之量。初由己之愛情。及將加於人之職位而別。繼以其人善用聖寵。立功修德爲度。功德愈增。恩寵亦愈富。乃天主之愛聖母。遠出諸神聖之上。自無始選之爲聖父之愛女。聖子之真母。聖神之淨配。似此高超之位。須備超出之寵。方能有相宜之功德而不愧。聖多瑪斯曰。瑪利亞產生耶穌。與聖寵之源。最相親密。故受寵至多而滿。致天神於來報時。竟若以滿被聖寵者。爲聖母之名。以聖母於此迴別他人也。厥後懷孕養育吾主。幫助耶穌成救贖之功。終生一舉一動。一呼一吸。無不由愛而發。

防及細微。似此歷數十年之久。隨在立功。時常加寵。而知主寵於聖母之靈。眞充盈洋溢。不可計量矣。

然稱聖母爲天主寵愛之母。不但因聖母獨自滿被聖寵。亦因其允生聖子耶穌。獻厥生命於主。以救贖世人。而亦若有分於施發聖寵也。惟當明知聖母賜人恩寵。非自具此能。第因吾主欲榮己母。報其無限功德。故以頒寵之權委之。悉遂其願。試觀耶穌方降孕。以聖母往顧而赦若翰之罪。賦以特寵。傳教伊始。復因聖母轉求。而頓變水爲酒。初顯靈跡。若此靈魂肉身之恩。耶穌旣因聖母而施於前。亦欲由聖母而沛於後也可知。耶穌於十字架上。以若望託聖母曰。此爲爾子。聖賢概謂耶穌於此定聖母爲衆人之母。託其護翼。付以全權。聖賢頌揚聖母施寵之能。幾衆口一詞。極誠盡致。不勝縷述。聖亞大納削曰。至聖童




貞。請爾記憶我。收我細微之讚頌。從汝聖寵庫內。分賜鴻恩於我。聖安。勿林曰。於爾所生之天主前。惟爾爲人之中保。人惟賴爾。可得真實之樂。天主外。惟托付於爾。乃得安穩無虞。又曰。天主聖三。立汝爲萬物之主母。天主聖神外。惟汝爲人之安慰。中保耶穌外。惟汝爲衆人之主保。噫。聖母真爲聖寵之汪洋。聖寵之泉源。沛流普天之下。滋潤諸人之靈。使能發生聖德之菓。雖常外流。常盈不竭。加諸衆而有餘。我等窮苦之人。當滿心依恃。至此聖寵座下。求賜涓滴之潤。今同天神慶祝聖母曰。

祝言 亞物滿被聖寵者。聖子耶穌爲恩寵之源。嘗降孕於汝胎中。由爾而生於世。寵錫衆人。故耶穌而後。我之諸望。當盡置於爾。有爾轉求。我雖無功。可望罪過之赦。優裕之寵。善終之福。天堂之榮矣。天主寵愛之母。爲我等祈。



至潔之母爲我等祈

潔者無罪過之謂。聖母始胎無原罪。又無原罪之遺累。一生堅定於善。無細小之過失。此意脫理登公會議。言之鑿鑿。不容疑議。聖奧斯定曰。一言瑪利亞。請勿問罪。蓋其聖德。堪爲天主之母。自然罪類莫容矣。聖達米盎繼曰。非然者。聖子將羞慚無地矣。聖多瑪斯謂潔德之等級。由遠罪之等級而別。聖母瑪利亞無原本諸罪之玷。故於諸受造之中。最爲潔淨。蔑以復加矣。天主係至聖之聖。與罪有無窮之間隔。永不能並立。凡人而愈近天主。必愈遠罪過。然受造中親密天主者。豈有逾其生身之母者乎。聖母與天主聖父有共一聖子之誼。與天主聖子有母子之情。又特爲天主聖神之淨配。除耶穌人性外。無有比聖母更近天主者。既無有比之更近天主。亦無有比之更潔矣。



聖母於諸聖中。至爲清潔固矣。然超越幾何。我以聖經之言答曰。如麗利亞花之比荆棘。蓋欲保潔免染。端賴聖寵。而聖母蒙寵之多。按多數超性學士之論。逾諸神聖併合之寵。自不特罪影何從可入。更潔淨奪目。遠逾天神。宜乎天主聖神。見而稱之曰。汝爲全美者。於汝無絲毫之玷。今我思聖母之潔淨。而知天主如何恨罪矣。不論何罪。皆乖亂倫常。天主不得不之惡。犯罪者反叛天主之權令。天主不得不之罰。沒良於至大恩主之前。受其生養保存之恩。卽用以得罪之。天主不能不之憎。噫。似此真實道理。大能起人恨罪之思。雖小不敢故犯。宜反覆深思。常置諸心目。庶謹慎戒懼。忠於大事。亦忠於小事。不敢復犯于後。再恐力有不逮。當呼求聖母。眞福亞惟辣述曰。有多人以愛敬聖母。得保其潔。聖多瑪斯傳記聖人云。熱心瞻視聖母之像者。覺淫慾之火頓消。我今同聖教

會向聖母曰


祝言 吁。聖母。我心污穢。罪惡貫盈。本無顏見爾聖容。無詞頌爾純潔。然因爾雖至潔。不棄污者。雖全善。不絕惡者。今求助我真全痛悔。以後益檢斂身心。謹慎耳目。庶亦能冰清玉潔。不愧爲爾之孝子。吁。瑪利亞。汝之聖名。極有德力。能勝不潔之誘。我將呼求不息。依恃爾。可望至終身靈清潔。死後見爾聖容於天上。至潔之母。爲我等祈。

至貞之母爲我等祈

世間別無他事。較貞潔之德。更可尊重。惟此貞德。若將人脫除肉體。不爲其所役。可以專心盡分事主。修己淑人。故卽教外人民。亦皆重視貞節。每建坊設像。以旌表之。聖母瑪利亞亦爲亞當之裔。亦有肉軀。惟因聖子將由之而生。故蒙天主特佑。始胎無原罪。并無其累。終生五官順理。七情不偏。雖有形身。而度天神之生命。且比天神更爲清貞。昔厄襪於犯罪之前。本無私慾偏情。豈天主母而可有情慾之累乎。豈可如凡人同保祿宗徒嘆曰。惜哉我也。誰救脫我於死亡之身乎。此定不稱天主聖子之榮光。不合天主聖母之高位。聖奧斯定曰。聖母之身。乃基利斯督體血之所由成。謂其死而朽敗蟲腐。我不能不覺驚厭。然肉身死後臭壞。乃其本然。猶覺不稱天主之母。況私慾之累。本由罪而來。爲罪

惡之媒。豈容沾染主母之身哉。

聖奧斯定論童身之德。謂雖修於形體之內。實有越乎形體之處。此言更驗之於聖母。蓋聖母雖有軀體。猶如無身。超出人性之上。若具天神之性。且遠勝天神。聖教會謝主經上咏曰。爾不厭童貞之胎。若非聖母貞德至極。聖子豈屑居其胎中九月。且一生周旋親密。勝於世間母子乎。然勿思聖母無慾情之累。故其貞德不甚可奇。蓋遏慾制情。雖爲大功德。勝誘之榮。固當尊重。然若無私慾偏情。肉身不與靈魂背逆。使邪魔無機可乘。罪過無隙可入。與主永無離背之虞。非更爲可欽可羨乎。耶穌因係天主聖子。不能有肉情之累。聖母以主特寵。亦脫私慾之擾。不若吾儕可憐罪人。有此肉身。爲常隨不息之內仇。不與之爭戰。不能保守貞操。然慾情雖旺。非卽爲罪。有聖母之轉禱。天主之聖寵。亦可不



聖母禱文疏解…


至貞之母爲我等祈

五十

被其害。惟當自奮勉。聽耶穌之訓。醒且禱。慎守五官。謹防像司偏情。避諸犯罪之機。特於受淫誘時。求主以外。更切恃聖母之佑。乃可履清懷潔。不爲罪污矣。祝言 聖母。汝雖無肉情之累。然仍苦身克己。隨在防閑。不敢稍忽。又聖經記爾將吾主言行。懷藏於心。是爲我當效之良法。守貞之格言。惜我前以不知戒慎。縱志肆慾。忘棄主事。而屢陷於罪。今知我錯誤。求爾賜我特佑。謹防五官。習行克苦。樂思聖道。隨在祈求。庶可清心寡慾。事爾於地。見爾於天焉。至貞之母。爲我等祈。

無損者母爲我等祈


童貞之德。爲聖母特別珍重。聖教會欲人思念不已。故若不厭重覆。續加無損者母。無玷者母兩句。以擴充其意。推揚其詞。無損云者。頌聖母因天主聖神之工。懷孕產生耶穌。不坼不副。無損貞身。先知依撒依亞於天主降生七百年前。以主默示。預報奇事曰。將有一貞女。懷妊產子。名稱厄瑪奴爾。譯言天主與我等偕。處女生子。無損童貞。誠爲天主全能之功效。令人驚奇不止。聖奧斯定訝曰。童女爲母。爲母仍爲童女。生子而子無生身之父。產子而不損母之童身。非靈奇之靈奇。莫名之妙蹟乎。聖伯爾納多曰。我欲讚聖母之貞。則諸童貞皆有此榮。欲稱聖母之謙。則教友中效耶穌之表。而真謙者亦多。欲揚聖母之慈善。則世間慈憫者。更不乏其人。然有一事焉。莫爲之先。莫爲之後。無一人與之共者。乃童貞。



而兼有爲母之榮。是爲聖母獨得之恩寵。夫此靈奇。固超諸本性之上。然思元祖並無父母。止以主一命而生於世。豈全能之主。不能使童女產己聖子乎。且若聖子亦依常道而生。何以別之於常人。知其爲天主乎。

我信其因斯彼利多三多降孕。生於瑪利亞之童身。稱讚天主之全能上智。爲此至奇之奧蹟。顯揚聖子之尊高。加增聖母之榮耀。啟迪後人。重視愛慕貞德。噫。天主神體也。欲人拜之以神。人雖有形身。倘肯克治私慾。禁止偏情。潔己心意。去一切不正之情。潔己像司。撇一切險危之景。潔己五官。絕一切無益之快樂。動靜端方。語言不苟。起人好德之心。以事天主。以愛聖母。斯爲善矣。

祝言 吁。無損者母聖瑪利亞。爾爲聖若望所見之靈奇。身披太陽。首戴十二明星。月踏足下。太陽表耶穌義德之日。汝懷之字之。其光輝四射。環繞汝身。十



二明星。係諸純德之像。爲爾榮光之冠。月光時增時減。不能常耀。踏於足下。表汝之貞德。常明常朗。從未損晦也。昔聖盜博羅。削於耶穌聖誕瞻禮日。稱嘆曰。普世當奇童女生子。子爲天主。宜乎生於童女也。聖母。我亦願盡力效爾貞潔。惟求汝特加恩佑。俾能守我身心。至終不遭罪過之損。無損者母。爲我等祈。



無玷者母爲我等祈

此句稱頌聖母不獨於產生耶穌時。無損童身。以後亦常貞潔無玷。聖教會訓人曰。聖母卒世童貞。係信德之道。不信者爲異端。蓋聖母產生耶穌而後。益爲天主所聖。更絲毫不容侵犯。故天主聖神稱之爲扃園封泉。有天神持火劍看守。誰能驚犯乎。且卽非聖教當信之端。止依理推之。亦知聖母終生童身無疑。聖母允與聖若瑟成婚。因知若瑟不奪其貞操。且亦矢志守貞。至死無他願也。聖母懷孕天主聖子。躬爲天主之聖殿。不但天主以聖子之故。不能容人稍褻。卽聖母亦何能忘主大恩。自辱辱主乎。是故諸聖師明人衆口一詞。共揚聖母終生無玷。聖熱羅尼莫曰。聖母身靈恒清潔聖粹。卒世童貞。聖盎博羅削曰。瑪利亞爲童身之首領。貞光從未見蝕。聖伯多祿克利騷克曰。瑪利亞生天主聖



子貞潔益進。不能輕犯。聖母聖誕及至潔瞻禮。彌撒中默禱經云。基利斯督由童女而生。不但不減母之貞身。而更加祝聖焉。

吾儕默思聖道。總須收取神益。今想聖母無玷。當收何益。上已言及。人領聖體。與耶穌深結爲一。若聖母之懷孕聖子。然何故仍多耽於肉樂。不羨慕貞德。非因領聖體前備之不謹。若爲常事。領後卽忘此大惠。不知感謝祈求乎。倘人於領聖體前。深思片刻。將進我胸者。非人非神。實爲人神之大主。能不備之加謹乎。領聖體後。思天主在己心中。與主密邇難言。能不活天主之生命乎。食此童身之體。飲此養潔之醴。誰能思之而不知奮勉。保守身心哉。

祝言 聖母瑪利亞。我能以何辭。頌爾貞潔。讚爾終生無玷。聖安。勿林曰。是誠爲從古未有之聖蹟。不能解之靈奇。如梅瑟所見之叢棘。焚而不燬。若古教用



聖母禱文疏解…

無玷者母爲我等祈

五十六

香之金爐。芬芳外撲。惟爾身靈清潔。卒世童貞。遠出諸童貞之上。噫。以爾寵佑。望我亦能稍嘗貞德之怡。求之愛之。若渴鹿之奔赴清泉。自今以後。我願善領受選者之餅。渴飲養貞之酒。倘我亦被主聖召。誓守童貞。更當依爾恩佑。盡我心力。保守身靈。至死無玷。庶得隨爾之後。密邇無玷羔羊。同唱異曲於天上。無玷者母。爲我等祈。

可愛者母爲我等祈

人心非愛不生活。不能無所愛。亦不能不愛美善。惟惜錯誤者多。不愛真實之美善耳。天主本性。係無窮美善。可愛無比。故在天神聖。識之既明。愛之自不能已。識之愛之。卽爲其真福。天主將己美善。相通於受造之物。有多寡之殊。有本性超性之別。得之愈多者。愈爲可愛。乃天主加於聖母之美善。遠出神聖之上。故其可愛之處。亦遠逾無比。論其本性形體之美。容止端雅。見者莫不傾心羨慕。至聖第阿宜。削謂。倘不知天主無形。幾疑之爲天主矣。聖安多尼曰。耶穌而後。聖母之體度至尊至美。蓋耶穌之體。以結合主性而美。而聖母產生結合主性之體。其美不宜相若乎。至論聖母靈魂之美。更出衆人之上。聖安多尼曰。耶穌聖靈而外。聖母之靈最尊。聖經曰。我友。何其美也。何其麗也。又曰。汝爲全美




者。聖文多辣。伸言曰。謂爲全美。以身靈兼美。無有肖之者耳。聖厄彼法諾向聖母曰。天主以下。爾爲至美。熾愛普知諸品天神。皆遠不能及。宜乎天神見之。若驚訝相問曰。斯女爲誰。騰輝如嚮晨。娟娟如月。焯焯如日。威嚴整肅如蒞軍者。斯女爲誰。

至論超性之美善。神靈有主寵愛者。最爲美麗。卽天神本性之妙。亦不能比。見之者自生喜悅愛敬之心。有若不能禁者。然靈有主寵愛僅一分者。尙如此可愛。則滿被主寵之聖母。當如何。聖母於始胎時。受寵已逾至大聖人。自後不止日增月盛。更時刻增加。晝夜不息。而其超性之美麗。亦與並增。且聖寵富而功德亦多且粹。謙忍出衆。仁愛異常。有宗徒救靈之願。有致命忍苦之毅。超越天神之潔清。遠邁隱修之沈靜。總之內而心思意願。外而視聽言動。無不盡善盡



美。起敬起愛。至受造之物。不可復加之級。我今默思此理。首當效法聖母。求真實美善可愛之事。卽聖寵聖德。契主悅主。而輕視肉身空虛暫時之艷麗。上云靈有主寵者。甚爲華美。主與天神亦見而悅之。被寵愈多。愈爲美善可愛。人於死時有主寵愛者。其肉身復活後。亦光明逾日。永遠不變。是故在世克苦身軀。適所以永加之福也。何憚而勿爲。

祝言 聖母。爾爲天主全能之妙工。爾於主前。真爲可愛。天主愛汝逾諸神聖。可愛之母。誰爲子女。有如此盛德極美之母。而不知孝愛。不樂稱揚哉。然最悅樂爾心之事。乃肖似爾之美善。故我亦願重視神靈之麗。不顧外面之榮。俾能寵日增。德日修。而靈日見愛於天主及神聖之前。庶將於天上。見爾美麗之容。讚揚愛慕勿置。聖母求爾賜我此恩。可愛者母。爲我等祈。



可奇者母爲我等祈

天主造化之工。亦云奇矣。天地之大。萬物之衆。卽一草一虫之微。莫不奇妙入神。特造人爲萬物之靈。於一人之身。具衆物之妙。更爲可奇。於聖人爲尤甚。而於聖母可謂至矣。聖母之奇。奇於所受之特寵殊恩。奇於功德高峻。超越神聖。奇於轉達之能。無求不遂。奇於權能之大。上自天神。下至無靈之物。莫不聽其宰制。奇於施寵之多。無一人不蒙其佑。奇於榮福之大。位置之高。爲天地神人之元后。可奇者瑪利亞。童女而產子。受造之物。主之婢女。而爲天主之母。厄。襪。死亡之母之女。而爲生命之母。可奇者瑪利亞。爲天主無窮純全之肖像。爲耶穌無限功德之迴光。可奇者瑪利亞。爲上天神聖之歡樂。爲世上衆口之稱揚。噫。全能之主。真大展德能於聖母矣。使上天下地。自古至今。東西南北。皆讚頌。



之而終不能窮其妙。聖濟利爾聖伯爾納多皆曰。雖至有口才之人。讚美聖母。總不能稱聖母之尊高。我今思聖母之奇妙。不祇驚愕感嘆。亦宜收取實益。當知聖母奇於大事。亦奇於常事。以常事而爲之。備極純全。更覺可奇。動人仿效。故聖教會准行可奇者母之像。乃描寫聖母十餘歲爲女生時。在堂前大廊中。端坐紡績之景。容貌端莊。寂靜無聲。手中執紗。若停若紡。心內默思。與主契合。右傍插一童貞花。宛若垂頭向慕。左面柱一錠梗。足邊一籃。滿貯紗筒。上覆一書。半開半合。右足置小櫈上。是爲通行可奇者母之像。教皇庇護第九位。初見之下。亟讚如此造像。極有聖善之思云。今請爾想聖母在堂時。如何愛主作工。如何待人治己。外視之。與他女無甚異。然于數年中。功修之富。蒙寵之多。正已不知不覺間。備爲天主之母。創成至奇之功。若爾恒思聖母之表。而真心則效。



聖母禱文疏解…

可奇者母爲我等祈

六十二

之。則雖於人前。不行奇大之功。天主必見而欣喜。寵錫日加。且恐因汝忠於小事。亦將舉汝行大事焉。

祝言 聖母瑪利亞。汝爲天主奇妙之工。非人明悟所能思及。可奇兩字。乃天主聖父。給於聖子之名。聖教會以汝實至近至肖天主聖子。故亦以此名稱爾。噫。可奇者母。我不足讚揚汝之奇妙。第求賜我亦識主所加之奇恩。所定之超向。而感激報効。學爲聖人。俾得在天。更享主奇妙之榮福。可奇者母。爲我等祈。

善導之母爲我等祈

聖母善導聖堂之歷史甚古。其像之來歷亦至靈異。原於羅瑪鄰近才那匝諾城內有一女神廟。每年陽歷四月間香火極盛。淫風甚熾。及總皇公斯當定信從聖教。將該處地方奉獻於教皇聖西爾物斯德肋及其崩後。嗣位之教皇聖瑪爾谷將該廟地基洒掃清潔。造一座聖堂。名聖母善導堂。以敬奉聖母。時約在天主降生後三百三十七年。以後該堂歷時過久。逐漸坍塌。有寡婦伯德路濟亞同幾位熱心教友捐資修葺。正在動工。尙未告竣時。於一千四百六十七年四月二十五日。午後四點鐘。有多數教友在該堂內。忽聞空中奏樂聲。見堂頂上現彩雲一朵。漸漸降下。息於未經砌竣之高牆上。時該堂及他堂所設之鐘。無人叩擊。自行鳴吼。衆見彩雲漸散。露出一極美麗之聖母抱耶穌像。卽今



所仿畫行世之聖母善導像也。此像來歷極爲奇異。經多數明人查考。并有聖教公文爲証。知該像本繪於斯古大利山下之聖母領報堂牆上。一千四百六十餘年。土爾其人攻破該處後。司堂二人。已檢拾行李。整備他往。到堂辭別聖母時。忽見牆上之聖母像。如畫在紙軸一般。自行揭下。騰空出堂。繞以彩雲。經過多數陸地。及亞德利亞弟格海面。止於才那匝諾堂內。此像本畫於一重石灰粉面。幾經神力搬遷。歷時已四百餘年。而顏色鮮明。毫不損壞。如新繪者然。像容時露欣喜。時發光明。時顯憂愁。各照來拜聖像人之心境而變色。所顯聖跡甚多。卽倣其樣。或印或畫之像。亦屢顯靈奇。足見天主聖意。欲人敬禮此像。虔求聖母。給人善謀。導引我等走天國之路也。

聖教會定立聖母善導瞻禮。前教皇良第十三。又令在聖母禱文中。加善導之



母。爲我等祈兩句。非無深意。蓋觀普世人民。外教者不識真主。不由正教。空過一生。終投永獄。無論矣。卽聖教中人。亦有許多不務敬主之事。不憶救靈之要。迷於富財榮名聲色等罪。昏沉一世。後悔莫及。且卽爲熱心好修之士。於去私絕慾。勝魔繕靈諸功。倘無人善爲指導。亦難免陷入歧途。更有分當管理他人。特治人神功者。若無精明之師。修成之表。不將自誤誤人乎。況當今之世。大抵自作聰明。妄用自由。不屑求教於人。不肯聽從長命。故聖教會於前古後今人中。指一極智貞女。上智之座。充滿聖神善謀。爲天主降生之真母。在生數十年。暢聆常生之訓。躬備諸德。足爲萬世之表率者。賴其指引。蒙其恩寵。爲成聖成賢之指南。諸教友之明師善導。效其於領報時。謹慎從事。不隨俗尙。而輕於允諾。不執己意。而坐誤主功。效其終生純修日進。不遇難而屈。不逢順而驕。恒以



良心之訓戒。信德之光照。聖寵之感激。作日行之準繩。然欲臻此境。非特別上佑不可。故自今而後。屢向善導之母求云。

祝言 吁。至榮童貞瑪利亞。爾自無始。蒙主特選爲聖子降生之母。司聖寵之庫。爲罪人之主保。我乃爾僕之末。今奔赴爾前。懇爾於此涕泣之谷。作我領袖。爲我指教。因爾聖子寶血。賜我蒙赦諸罪。獲救神靈。得一切要助。以邀此恩。並賜聖教榮勝諸仇。傳揚耶穌基利斯督之國於普世。亞孟。又向天主懇切求云。天主。爾使愛子之母。爲我等之母。並以奇妙顯示。榮其美像。我等懇祈爾。賜我等恒遵其訓。在世克依爾心。死後安抵天鄉。亦惟爲我等主基利斯督。亞孟。卒再向聖母。加此誦句曰。善導之母。爲我等祈。

造物之母爲我等祈

稱聖母爲造物之母。非以其生造萬物。蓋聖母非天主。亦係受造之人。且萬物先聖母而有。定非聖母所造。造物之母云者。卽造物主之母。然造物主爲萬有之首原因。不能由父母而生。謂造物主之母。非矛盾之言乎。曰否。蓋聖母爲耶穌之母。耶穌兼有天主性人性。天主性固爲自有。無所從生。而其人性由聖母而生。然耶穌人性無本位。合於天主第二位。以天主之位爲本位。故聖母生耶穌之人性。卽爲天主聖子之母。然天主聖子與聖父聖神。同性同體。同爲造物之主。而聖母爲造物主之母矣。聖伯多祿。克利騷。克。曰。造瑪利亞於世者。瑪利亞生之於世。又向聖母曰。惟爾最爲可讚。造汝之主。孕於汝懷。汝之原始。由汝而生。生汝之父。屑爲爾子。汝之天主。屑取汝血體而成爲人。造化之工。雖爲聖




三所共。然歸於聖子。亦有特故。蓋聖子爲聖父之上智。依聖史若望之言。聖父緣之而創造諸物。且按多數超性學士之意。卽以聖子降生結合之人性而論。亦若爲造化之中心點。天主爲耶穌基利斯督之故。造其餘諸物。此雖非聖教定論。然確可信。大能推重耶穌之尊高。聖母之榮光。

聖母旣爲造物之母。其尊貴無以復尙。權能無以復加矣。萬物聽屬於造物主。而造物主聽屬於聖母。經不云乎。歸納[△]匝[△]肋[△]而屬下之。聖伯爾納定[◎]曰。瑪利亞生造物主者也。則瑪利亞亦萬物之主矣。又曰。受造之物。奉聖三令者幾何。奉聖母令者亦幾何。旣如上云。耶穌爲造化之中心點。天主先有伊於意。餘皆爲伊而生造。然耶穌不能爲人子。而無受生之母。故聖三自無始定聖子降生爲人。卽於能造未造之無數女子中。特選瑪利亞爲聖子之母。決意施與異寵。拔



諸高位。超越神聖之上。爲天地萬物之元后。我今思想聖母爲造物之母。感謝稱讚以外。當記憶我亦爲天主之物。亦爲天主所造。主能造無數人民善於我者。主未之造。而偏造我。非主有求於我。實出主之特愛。又造我於救贖以後。教友人家。認識真主。能享永福。不當盡我所有。以事主愛主乎。

祝言 聖母瑪利亞。求爾助我。勿爲無良之人。我本烏有。係主從無生我。安養保存。頃刻無間。我之所有。悉爲主之恩賜。可不完全爲主而用乎。聖母佑我。勿再負恩。造物之母。爲我等祈。



救世之母爲我等祈

救世之母。爲聖母諸名號中至甘怡。至安慰之稱呼。聖母爲救世之母。以其有分於救贖之功。考其事。特在二時。一天神來報時。欲聖母懷孕聖子。聖母允。而聖子降生之功於以成。聖伯爾納多曰。聖母片言之諾。實救衆民之命。二在耶穌受難時。聖母允願祭己聖子。以救萬民。故稱聖母爲救世之母。實以其產生幫助救世之主也。欲知聖母如何有功於世。須知其所生之耶穌。如何救贖世人。凡一事爲人極緊要。至有關係及利益者。而汝爲之。又宏量多情。其人必更視爲大惠。今試思救贖之恩。爲人如何緊要。有何關係。加何利益。無救世主。人將永遭罪罰。無免脫之期。永願享見天主。而永不能得。苦何如之。况耶穌降生爲人。以無窮之功。不但救人脫離罪軛。免受永罰。更大加優寵。多立善法。使人



生時易於免惡爲善。死後享見天主無窮永福。是爲再造之恩。視初次造化更爲奇妙。蓋天主初造人物。一命而成。無有逆之者。然吾主耶穌行救世之功。費盡心血。不損人自主之權。而得以救拔人類。使能與主復歸於好。益蒙榮寵。變化之功。不更奇乎。故於彌撒中。司祭者向主云。天主。汝造世人固奇。然變化之尤奇。

抑天主爲人情誼所強。或爲望人報答之故。而降生受苦至死。以成救世之功乎。不知人有何情詣於主前。本非其弟兄。非其友朋。亦非如有德旅人。遭時不遇。墜於艱難。而尙足哀憐。然係背逆罪犯。自遭永禍。且天主明知救贖以後。仍有多人辜負恩惠。或至少淡於報答者。而天主仍加愛惜。降世以後。普著慈祥以激之。垂留訓誡以導之。流血至死以救之。此爲何如之恩愛哉。非天主。誰其



能之。噫。教友。世間最爲人厭惡者。乃無良之輩。倘有人冒死險。救汝生命。汝必視爲極大恩人。愛之報之。否則將爲人不齒。聞者生惡。今耶穌救汝永遠之生命。聖母生之養之。祭獻之。有分於救世之功。而汝不以爲念。更屢加罪過。以怨報德。尙可謂有人心乎。受造於主者。已當全心事之。況又受救於主。不當事之加倍乎。噫。我之生命。非我自有。係造我救我者之生命。自今以後。願常活於主。不願再活於我。更願愛事我性命之主。并生之之母矣。

祝言 聖母。汝於十字架下。獻聖子之命以救我。我將惟爾母子是愛。我縱不能捨血以報主之聖血。亦願稍受苦勞。以愛報愛。然真實之愛。顯於行爲之中。故欲盡心事主。安救神靈。毋使救贖之功。爲我徒然無益。救世之母。爲我等祈。

極智者貞女爲我等祈

瑪利亞爲母兼爲童貞。故聖教會以母之諸名。呼求聖母而後。又教人以貞女諸號尊敬之。又以智爲樞德之冠。聖母諸德純粹。導人進修之路。故首稱曰。極智者貞女。爲我等祈。夫聖母之言行。雖聖經記述不多。然卽所傳者而觀之。已大顯其智。遠出厄。襪。諸女之上。聖母雖無原罪私慾之累。且父母俱賢。居家不難事主。繕靈。然以常情而論。與世往來。最多喪靈之險。不能壹意事主。故據相傳之言。年甫三歲。卽別離親族。前赴日路撒稜聖殿。獻身於主。專志潛修。智也。年十五。天神來報曰。亞物。滿被聖寵者。主與爾偕焉。女中爾爲讚美。聖母聞言驚異。不知所措。何哉。以其慣於獨居。不見人物。今忽見天神作男子形。顯現目前。卽生恐懼。及天神言將懷孕生子。聖母之疑慮益甚。知懷孕生子。依性例不

能與所發守貞之願並立。爰不貪主母高位。毅然答曰。我不識男。此事曷成。初不鹵莽從事。迨天神爲之解明受孕之由。無碍童貞。便不再究問。應承主旨曰。主之婢女在茲。希惟致成於我。如爾之言。此皆爲智德之功用。先啟人神曰。使默察事理之是非。繼閉人肉目。使深信不疑。又聖母初孕天主聖子。若瑟尙未之知。聖母當時不卽告明。迨聖胎日顯。若瑟懷疑憂惑。而仍緘默不言。恐智者當不出此。不知此適足見聖母之智。蓋其明知如此奧跡。非人言所能明。况親自宣揚爲天主之母。不合於謙。更非智者肯爲。又知依恃天主者。終不受辱。故卒默默無言。祇求天主上智措置。果然未幾。天主卽遣天神夢解若瑟之疑。不虛聖母之望。

耶穌在孩提時。雖不與他人晤語。想必與聖母密談天上奧事。聖母豈不願傳



之於衆。然以耶穌顯世之時未至。故置之於心。不洩一語。耶穌聖誕後四十日。聖母行取潔禮。與凡婦同。示人德表而外。亦以其智識之大。欲隱己高位。不致啟人疑竇。又觀耶穌年十二。在堂講道時。聖母尋覓三日。失而復得。遇於聖殿。此時不甚明哲者。每易言語失慎。洩漏密事。而聖母所出之語。不能令人知耶穌爲天主聖子。已爲童貞之母。自後聖經紀聖母之事。更屬寥寥。然衆皆知聖母爲耶穌所喻五智女之表率。常備愛主善功之油。以待新婚者入夜歸來。聖伯爾納多曰。童貞聖母之燈。常明不熄。光輝異常。天神見而稱奇。吾儕教友。亦皆蒙主邀請。入與天席。然不知主人何時歸來。常當善備以待。若五智女一聞主人蒞至。卽攜燈出迎。乃得與之俱進天國。享永福之筵。是故真實之智。爲好修士極其緊要。乃他德之樞紐。聖經囑人重視之。勝於國位寶物。聖多瑪斯謂



智之於他德。若太陽之發生諸物。故吾儕當置諸心目。不可須臾離也。今向聖母求曰。

祝言 聖母。惜吾儕明光之子。反不如俗子之智。將主所賜之明悟。每用以求利沽名。爲暫世計。而於靈魂永遠之事。反如瞽者之不見由來去路。不知輕重。眞爲可惜。聖母。以爾極智。深明事情之本末。恒擇至善者而行。賜我亦知事主救靈。爲獨一要務。賜我識破三仇之狡計。避諸險危。賜我精於習行天賈。脩德立功。多多益善。以增永福於天上。極智者貞女。爲我等祈。

可敬者貞女爲我等祈

世間明達美善。德高位峻者。皆足動人尊敬。若能兼而有之。更遑乎其極。未有識之而不傾心拜服者矣。今論聖母之明達。自始胎時。卽蒙聖神默導。洞徹修靈事主之道。不言其他。止觀其自幼無他人之表。矢守童貞可知矣。自懷孕產生耶穌而後。與上智天主朝夕周旋。觀其表樣。聽其訓言。心思相合。意氣相投。古今人仰效主心。皆不及聖母之探微入奧。耶穌因係真天主。故雖聖經言其智識與年並長。然祇日益顯示於外。非實有加增。而聖母則於精修聖學。真日增月盛。不容猶豫。耶穌升天後。宗徒有疑難事。聖經雖不記。定必就正於聖母。而聖母之明達可知矣。至論聖母之美善。一語足徵。蓋其懷孕吾主於胎。當爲上天下地最美麗之宮殿。聖若望大瑪瑟諾曰。天主造聖母。本性尊而聖寵備。

斯克稱其高位。

若夫聖母之崇德。更足啟人敬仰。上云聖母自幼矢願守貞。當知斯時如德亞女俱奢望生救世主。爲天主母。故以荒胎爲羞。而聖母不惑羣議。獨矢冰貞。愛潔無以尙矣。論其謙德。聖伯爾納定一言以蔽之曰。除天主聖子外。無有尊高如聖母者。亦無有謙下如聖母者。譙於加納地。席間乏酒。主人並未求全顏面。聖母已不忍於心。求耶穌顯靈蹟以助之。慈憐如何。更觀其剛毅之德。於加爾瓦畧山上。斯時宗徒概皆遠去。而聖母獨立架傍。視愛子週身傷創。聖血淋漓。傷心莫甚。然毅然忍受。不作啼哭狀。獻耶穌之死。以救普世之人。心之勇毅可知矣。若夫聖母之高位。先聖先賢亦已稱之詞窮意盡矣。聖伯爾納多曰。於世上至爲可敬者。乃懷降生天主童貞之胎。於天上至高之位。耶穌而後。爲聖母



之位。其榮光稱其在世時。所受聖寵之量。超諸受造之上。聖安瑟爾莫向聖母曰。我之母后。無有與汝相並者。或在汝上。是爲天主。天主以外。皆在汝下。依聖伯爾納多之意。聖母之尊高。卽聖母亦不能自解。惟天主獨知之。我靈。汝今知聖母如何可敬。何故聖教會定許多聖母瞻禮。立許多聖母修會。多建聖母堂宇。多刻聖母牌像。多定聖母經文。多著聖母書籍。多講聖母道理。蓋知天主欲人尊敬聖母。有加無已。超諸神聖。而尊敬聖母。仍歸尊敬天主也。

祝言 吁。聖母瑪利亞。昔撒落滿王欲光榮己母。見其前來。卽自寶座起。肅出恭迎。特設一座於右。敬請安坐。聖母。是爲聖子耶穌敬爾之預像。福哉敬爾之人。特悅耶穌之心。我亦願愛敬爾於神聖之上。我亦願世上諸人。皆認識爾。奉事爾。庶能得汝特佑。至死忠心敬主。得救己靈。可敬者貞女。爲我等祈。



可頌者貞女爲我等祈

萬善皆由天主而來。故惟天主當受讚美。頌人之善。終宜歸功於主。并須知其
實有可讚之處。否則讚之不當。實爲諂媚虛詞。今稱瑪利亞爲可頌者貞女。無
懼乎讚之太過。惟恐讚之不及。蓋惟天主知人心事。亦惟天主知誰當受讚。受
何讚美。天主昔遣上品天神嘉俾額爾。稱賀聖母曰。亞物。滿被聖寵者。主與爾
偕焉。女中爾爲讚美。夫受天神之降顧者亦多矣。然曾有一聖。聆若此企仰尊
敬之言乎。聖盎博羅削曰。似此讚美。人從未曾聞。抑或天神稱頌聖母。過乎其
實乎。不知天神被主遣使。乃傳天主之意。真實之主。豈有不實之言乎。又聽聖
婦依撒伯爾之讚美。而益見聖母爲可頌矣。經紀聖婦依撒伯爾。受天主聖神
默照。啟口述天神之末語曰。女中爾爲讚美。又續加一句曰。爾胎中子並爲讚



美。此兩句。依聖伯爾納多之意。若指明聖母可頌之緣由。并頌之之分量。對聖母謂女中爾爲讚美。因聖母先蒙主寵。產生聖子耶穌之故。而稱胎中聖子耶穌。則混言讚美。因耶穌爲萬善萬福之原。當讚之於萬衆之上。無窮之世也。更可注意者。聖母於往見聖婦依撒伯爾時。不但聖婦以主光照。知聖母爲天主之母。而極口稱揚。且聖母亦因聖神默運。作我靈讚頌主一歌。雖將諸功歸於天主。然亦認主大展德能於己。而萬世將頌爲真福。是爲聖母之預言。最有應驗。聖教會自始至今。廣傳普天之下。凡爲教友。讚美天主。稱頌耶穌者。亦莫不極誠盡意。讚頌聖母。

或問耶穌在世時。亦頌揚己母否。予曰。聖經未曾記及。然一日耶穌於講道時。羣衆中一婦高呼曰。懷爾之腹。哺爾之乳。福哉。耶穌答曰。聽天主之言。而遵守



之者。更爲眞福。按聖盤達之解。耶穌此言。寓應証該婦稱讚之意。意謂我母生我。哺我。果爲有福。然以其聽從我言。更爲有福。惟當知讚美聖母。終歸讚美天主。聖隨奧爾尼各末曰。讚美聖母之聲。天主聞之。若爲讚己之詞。故諸聖人無不傾盡衷情。琢詞摘語。以頌揚聖母。而不慮言之過甚。聖巴西畧帥來西曰。不論如何讚頌聖母。終無憂過分。蓋總不能及其尊高也。吾儕旣不能頌之得宜。當補以恭敬之禮。并遇有機會。傳揚聖母之光榮。啟人愛敬。特效其德表。使人見我。如見聖母之肖子。而顯榮聖母。

祝言 聖母。汝於胎中。懷天地不能容之大主。我卑微罪人。何能頌爾得稱乎。惟天主當受無窮之讚美。天主而下。惟爾當受讚美。歸榮於主。昔宗徒傳教普世。到處稱頌爾名。諸講道著書之人。多揚爾功德。宣爾權位。普天信友。一口同



心。日誦女中爾爲讚美。聖母。賜我亦爲爾忠僕。稱頌汝。恭敬汝。揚爾光榮。效爾功德。庶望後於天堂。同諸神聖。讚美爾。到無窮世。可頌者貞女。爲我等祈。

聖母禱文疏解...

可頌者貞女爲我等祈

八十三




大能者貞女爲我等祈

耶穌以天主而論。本性自有全能。以人性而論。因自受孕始。即與天主聖子。合成一體。後又爲人受難釘死。成救贖之功。故亦無所不能。耶穌語宗徒曰。上天。下地之權。悉付於我矣。耶穌爲聖母之子。故將此權能通於己母。聽其使用。聖老楞佐。儒斯定。曰。母與子之權能爲一。子全能者。母亦全能。聖母贊襄耶穌成救贖之功。既分其愛苦。自然亦分其權能。管掌普世。聖奧斯定。曰。聖母與於救贖之功。故亦能施人聖寵。況耶穌在世時。謙卑自下。聽聖母之命。今在天堂。雖非聽命之時。然孝子之心。定不更變。故聖文多辣。謂聖母無求不得。聖伯多祿。達彌盎。向聖母曰。天上人間之權。悉付於汝矣。汝果無事不能爲。失望者亦能使之被化得救。又曰。聖母之求有若命然。是以許多聖人。直稱聖母爲全能。然

與天主之全能大異。蓋天主之全能。爲本性自有。聖母之全能。爲天主恩賜。借給。謂其無求而勿得也。在天神聖。所以能助人數事。施人幾恩者。以曾立功於主前。見寵於主。故天主榮之。隨其所願。加惠世人。然試問立功之多。蒙寵之富。誰能幾及聖母哉。由是以觀。聖母自宜無求而不得矣。聖安瑟爾莫曰。我知真福童貞。功與寵均臻其極。凡有所欲。莫不見效。

聖母之權能。不但在爲人求恩。亦能措置萬物。聖伯爾納定曰。或爲天神。或有明悟之人。或是無靈之物。或在天享福之聖人聖女。或在獄受罰之魔鬼惡人。凡屬天主之權者。亦屬聖母之權。因天主之子。即瑪利亞之子。子欲母之權。稍似其父之權也。此事不必多証。第觀聖母加恩之多。時不分今古。地勿別中西。事無論大小難易。凡起死。療病。驅魔。勝誘。守貞。聖召。進德立功。安心善死。免投。



永火。早出煉獄。種種奇恩崇寵。凡歸天主榮光。神靈利益者。無有懇求聖母。而不能得。人各問心自知。不必引証。此固顯聖母之慈善。亦証其權能之大也。我今默思聖母之大能。當更深依恃。不論遇何患難。有何憂苦。速即呼求聖母。勿待至用盡他法。然後往求。

祝言 聖母。汝爲天地之元后。我願揚汝權能於普世。使衆人皆知天主顯厥臂之大能於汝。無不能成之事。聖母。施爾大能。憐佑我衆於斯世。特於臨終之時。輔我勿墜魔誘。死後由爾慈母之手。扶引至聖子臺前。聽判之下。免遭獄苦。得享天榮。永遠稱讚爾之大能。大能者貞女。爲我等祈。

寬仁者貞女爲我等祈

倘瑪利亞有權能。而不肯用以廣施恩寵。憫憐世人。仍爲我衆無益。然瑪利亞不若是。瑪利亞爲寬仁者貞女。其慈憫不減於權能。聖伯爾納多曰。權柄願欲皆不缺於聖母。聖利高烈伸解曰。聖母能救我人。以其爲天主之母。願救我人。以其爲我等之母。聖伯爾納多向聖母曰。爾之寬仁。誰能量其廣遠高深哉。廣則惠及天下。無地不屆。遠則直至世界窮盡。無時求而勿應。高則天上榮光。藉爾而得增益。深則居於幽暗之中。死影之內者。賴爾而得救。又曰。若有人記憶求爾。而未得汝佑者。可不讚汝之寬仁。復斷曰。此從古未聞之事也。依聖文多辣之意。聖母若是願人祈求。獲其恩惠。不求之者。亦爲得罪聖母。欲祈求聖母。本不必多念經文。倘出自真心。一啟口。訴己困苦。卽得其助佑矣。

名士利。藹爾孫。惟克曰。聖母知人之苦。若不能不加助佑。夫聖母之宏恩。固大顯於孝子之身。特寵之靈。如聖類思達尼老等。皆因甚愛聖母。而聖母愛之尤甚。願復情深。寵錫靡限。使能度生如天神。少年而成大聖。

然聖母之寬仁。更著於犯罪之人。蓋犯罪者爲耶穌之仇。本亦爲聖母之仇。而聖母仍慈心不絕。設法挽救。止主聖怒。多加寵佑。引之悔惡從善。復與聖子和好。然後心安。何其寬仁哉。聖多明我曰。即衆聖人棄絕我等。不聽我等祈禱。瑪利亞之慈心。終肯矜憐。聖母顯於聖婦俾利日大曰。不論人犯罪多寡。苟肯全心悔改。回至予前。予必收納之。不視其犯罪之數。惟視其改過之誠。我聖子至極慈善。使我同具仁衷。見苦輒加矜惜。彼能乞憐而不乞憐者。眞爲可惜。余靈倘爾有主寵愛。爲聖母之孝子。益當竭力盡心。愛敬聖母。彼必萬倍愛爾。聖文。

多。辣嘆曰。愛敬此后者。乃真福。因此慈后。必不讓愛之者勝其愛也。倘爾不幸有重罪在靈。定不可恃聖母而怙惡不改。然亦不當失望聖母之慈佑。求其引汝痛悔告解。定心改過。以後賴其扶助。不復陷於罪。

祝言 寬仁者貞女。汝之慈憫恩愛。誰能道於萬一哉。汝昔在世。見新婚者乏酒。即求聖子變水爲酒。以矜全之。今汝在天。見人困苦更明。仁慈亦必更大。吁寬哉。仁哉。甘哉。卒世童貞瑪利亞。聊亦回曰。憐視我衆。使能常恃爾仁慈。獲爾寬恩。至終爲爾孝子。寬仁者貞女。爲我等祈。



大忠者貞女爲我等祈

聖母一生忠於事主。忠於盡分。忠於承主聖寵。忠於奉行主旨。從無疏忽之行。頃刻之懈。故大忠者一句。實爲最合聖母。最悅聖母之稱呼。忠乃美名。聖經記天主自稱爲忠者真實者。又以此名賜於義德之人。稱爲忠信之僕。然聖人在世。以原罪遺累。終不免時有小過。未能全用主寵。聖母則不然。終其生。一言一念。一舉一動。無不盡善盡美。獨備受造者可造之純全。若是德日修而功日加。直至榮召升天之時。蒙公義之主。拔諸神聖之上。置之榮福之巔。永受忠信之報於天國。聖母汝之踪跡。何其可欽可愛也。何往而不盡忠於主。領天神之報。受選爲天主降生之母。而不即輕然應允。忠於童貞之願也。不辭路程艱遠。往見表姊依撒伯爾。忠於聽主默啟。敬愛親長也。往白冷郡注册。忠於從王命。如

主命也。生耶穌後四十日。行取潔禮。忠於守古教禮規也。耶穌年十二。聖母同往。日路撒稜朝拜天主。忠於公堂敬禮也。日常操中饋。事女紅。數十年瑣屑不辭。窮苦無怨。忠於小節也。


然更顯聖母之忠信者。乃毅然屈抑爲母之常情。密契主意。祭已愛子於加爾瓦略山而不惜。噫。試思聖母爲何等之母。耶穌爲何等之子。耶穌之可愛。勝於凡子也。無窮。聖母之愛耶穌。遠出世間之母。愛其至善之子。乃竟爲順主聖意。忍心祭之。獻之而不顧。親見愛子死於十字架上。淒慘萬狀。而不怨不離。真可謂極忠至死矣。旣知聖母爲我人類。捨己愛子而不辭。豈有不肯聽人呼求。加人輔佐之理。聖母若以聖經之言語。人曰。聽我言。日侍候於我門者爲真福。聖利高烈。仲說曰。福哉。侍候於聖母之門者。求其助佑。如窮人俟於富者之門。求



哀矜。聖人又曰。吾儕何不忠心奉事聖母。如聖母之忠諒寬洪。聽人祈求。賜人恩佑乎。噫。倘常人之求。聖母尙慨然允聽。忠僕孝子之禱。豈能置之不顧哉。祝言 聖母。汝昔在世。恒忠心事主。汝今在天。恒忠心助人。從未聞呼爾佑。求爾救。而有一愬置之者。大忠者貞女。求賜我亦忠於事主。忠於盡分。忠於大事。亦忠於小事。庶可於死後。聞吾主曰。忠信之僕。進享主之眞福。大忠者貞女。爲我等祈。

義德之鏡爲我等祈

聖教會既以貞女諸名呼求聖母而後。意猶未盡。復尋喻像等名目。以尊頌之。先稱之爲義德之鏡。鏡乃回光照像之器。聖保祿宗徒謂天主聖子。爲聖父榮光之輝耀。本體之肖像。我亦能謂聖母。爲耶穌之光輝寫真像。如明光寶鏡。顯露耶穌之崇修偉行。惟妙惟肖。蓋聖母爲造物主首出之功。聖安瑟爾莫云。非天主。皆在聖母以下。天主既若是推尊之。能不使之德修純粹。與聖子耶穌至相彷彿乎。否則不稱其高位矣。聖伯多祿克利騷克曰。聖母爲天主至肖之像。故默思聖母之奧妙。而不驚愕出神者。爲不識天主。耶穌係義德之日。普世人靈。賴其光照。受其溫煖。乃能發生德行之菓。聖母乃義德之鏡。如明月迴折日光。反照于夜。聖母折射耶穌真光。以轉照普世。俾皆見主聖德。情深景仰。故茲



所稱義德。非特公義之謂。乃總括諸德。與耶穌云。嗜義如飢渴者之義同。謂聖母爲諸德之型。人當用以默思對照。修飾已靈。

聖保祿宗徒又以靈魂有主寵愛。有分於永福爲義。夫此超性之境。榮福之分。元祖犯罪而後。本已失落。然天主仁慈。親許救世。對魔鬼曰。將有一女及其子。踏碎汝頭。此女即聖母。故人於聖母之身。如於鏡中。能見己負罪之深。困苦之甚。須天主降生代贖。乃得脫免。又見補贖之緊要。非此不能沾耶穌救拔之功。天神見聖母雖係人類。然被主特寵。德修超出己上。故亦仰企芳型。如瞻明鏡。且超性學士如司谷德。蘇亞類思等。意當初天神。亦賴將生之耶穌。而得定於善。永享榮福。故天神於欽敬耶穌而外。亦必感戴其母瑪利亞。至受罰傲神。見聖母因謙下而擢爲主母。益覺傲驕之非。然罪由自犯。並無他人牽引。且一犯而

不能復悔。惟有稱天主罰惡之公義耳。我今照聖母義德之鏡。不當一望而過。然常置諸心目。視聖母何以見愛於主。有何功德。如何修法。盡力所能。一一仿效。方德照鏡之益。

祝言 聖母。汝爲天主純全之寶鏡。望以爾德行之光芒。射於我靈。使我能視爾良善。改我暴躁忿怒。視爾謙遜。改我驕傲矜誇。視爾潔淨。去我之污穢。視爾熱愛。改我之冷心。視爾仁慈。改我之苛刻。聖母。以爾大能之轉求。使我靈常有主寵。且日益加增。更效爾德表。益肖爾聖子耶穌義德之日。義德之鏡。爲我等祈。




上智之座爲我等祈

天主聖子爲聖父之上智。自無始受生於聖父。創造萬物。措置諸事。剛毅而溫和。自有始降生爲人。懷於聖母之胎。抱於聖母之手。故聖母真爲天主上智降生之座。其光麗尊貴。非世物可以比擬。昔撒落滿王造一象牙寶座。飾以精金。光耀閃目。聖經欲言其尊美。謂普天之下。從未有若此之工。今我亦能云。天主全能。除耶穌人性外。從未造一尊寶華麗之物。可比至聖瑪利亞聖子降生之座。蓋於此座。依聖伯多祿達彌盎之言。至尊天主安居焉。依聖伯多祿克利騷克之語。萬王之王息駕焉。

聖經云。天主上智。造一宮殿。內設七柱。聖賢解宮殿爲聖母之像。七柱爲天主聖神七恩之像。聖母領受七恩。逾於萬衆。一爲敬畏。曾有何人。可比聖母之謹




慎精密。敬畏天主。從無絲毫疏忽。二爲孝愛。聖依特風索。謂天主聖神炙熱聖母。如大火透鐵。不見其他。惟見烈燄。故聖母之於天主。恒以逢迎聖旨。悅樂聖心爲事。勝於孝子之奉順父母。三是聰明。此爲作聖之學。示人於世。何者爲當盡之分。何者爲當行之路。以抵己終向。今觀聖母自幼靜居聖殿。童年矢志精修。應天神之語。當若瑟之疑。以及終身隱居窮處。與世無忤。而其識物之真可知矣。四是剛毅。誰曾顯此勇德。可比聖母祭己愛子而不辭。五爲超見。光照聖母於疑難之中。格外之景。俾能執守善道。不偏不倚。六是明達。導聖母透徹超性諸理。體會貫通。夢寐無間。七爲上智。使聖母明認造物之主。及萬物之向。於事主繕靈。待人接物諸道。深入精微。絲毫不爽。由此觀之。聖母之靈。富飾天主聖神七恩。豈不遠逾諸神聖哉。吁。天主上智。汝所備降生之座。何其珍美純善。



也。確如聖奧斯定云。若用盡汝全能全智富財。以創製之。彩飾之矣。我今默思此理。若仰見聖母光華之座。首當極恭致禮。謝主頌母。次求加我神光恩佑。使能不爲俗智所蔽。而隨真實之智。慎守身心。不被罪污。尋求天國。及其義德。施能實行。庶我靈亦可爲天主聖神之寶座。耶穌聖體。恒樂於降顧焉。

祝言 聖母。昔聖子耶穌語宗徒曰。汝棄諸有而從予。將坐於十二坐。同予判義撒厄爾十二族民。又於聖若望默照經曰。將賜得勝者與我同坐於寶座。聖母。此不足爲汝之榮。聖子耶穌愛爾尊爾。尙有加焉。蓋其自天降世。若棄熾愛。普知天神所成之座。而選爾爲座。初時孕於汝胎。嬰年抱於汝膝。死後聖身由十字架卸下。又接於汝懷。昔撒落滿王坐於象牙寶座。民見而悅之。樂從其訓。今吾主耶穌由汝寶座。訓人愛潔好貧。苦身克己。榮主愛人諸大道。我亦願側



耳而聽。傾心以從。聖母。汝誠爲聖寵德能之座。於汝身畔。可安然而寐。我願生
於此。死於此。望爾加我神力。聽從主訓。教我整備。邀主降臨。上智之座。爲我等
祈。

聖母禱文疏解...

上智之座爲我等祈

九十九


我樂之緣爲我等祈

元祖犯罪以後。逐出地堂。到此苦世。滿地荆莽。非勤勞不能活命。情慾利害。非力制不能行善。厄。襪。先於痛苦中。產生兒女。亞。當。親見己子。殺害其弟。以及種種罪惡患難。自此人種日益傳佈。罪過亦日益加增。幾無處不窮兇極惡。互相殘害。終歸哭泣喪亡而已。雖天主早許降生救贖之恩。爲一綫之光。苦中之慰。然遲之已久。除如德亞幾人外。幾遺忘殆盡。故於天主降生以前。人皆居於黑暗之中。死影之內。滿目淒涼。實爲可哭可憐。及聖母誕生。天主用之以生耶穌於世。助成救贖之功。而景况爲之一變。蓋自此人復得真光之照。知己本性之尊貴。升天之道路。將來之福樂。又得寵佑安慰。用以醫治病傷。忍受困苦。故卽於斯世。已能享受真淨之樂。預嘗永福之味。噫。聖母未生耶穌以前。誰識仁愛



貞潔之快樂。誰知謙遜刻苦之歡欣哉。耶穌救贖而後。乃有多人。思其苦難而感激流淚。領其聖體而樂以忘食。故吾儕於聖教中。所得快慰諸端。耶穌以後。皆自聖母之手而來。因聖母允天神之報。產生耶穌。而得出死亡之境。升於安樂之鄉。復得爲天主義子之樂。聖意助納。謂聖母一言之諾。爲普世生命之緣。聖伯多祿達彌。益言之更明。曰。天主聖子。欲以聖母。欲於聖母。欲同聖母。普救世人。若無聖母。則斯世依然如故。淒慘無光。聖老楞佐。儒斯定。亦詳述曰。因聖母而天主欣樂焉。天神愉悅焉。邪魔驚畏焉。憂苦之人。復得盼望快慰焉。

聖母有生以前。諸聖祖先知。於靈薄獄中。俟望其誕生。如於黑夜俟望黎明。耶穌升天而後。聖母尙久留於世。爲宗徒及新信友之安慰。聖母升天而後。爲天上諸神聖之榮光福樂。聖伯爾納定。曰。聖母升天。加天堂之歡樂。聖文多辣。曰。



在天神聖至大之榮福。見主而外。在得見聖母。聖母亦爲煉靈之欣慰。聖母嘗親告聖婦彼利日大曰。予爲煉靈之母。常以我之祈求。減其刑罰。聖味增爵。費來利曰。煉靈在獄。賴聖母而得安慰。然聖母特爲世上教友之快樂。不論何時何景。呼求聖母者。自覺心暢神怡。故聖教會定聖母聖誕瞻禮經文云。童貞天主之母。汝之誕生。爲普世喜慶之報。然不可誤會。非謂今有聖母。諸苦悉變爲怡矣。斯世仍爲涕泣之谷。耶穌救贖後。未復還人地堂中之福幸。惟云人由聖母而蒙主聖寵神力。則靈魂清淨。心地寬舒。雖遇艱難。亦能嗜苦如飴。多多益善。以增永遠之樂。我今感謝天主恩賜。得因聖母而有真純堅久超性之福。感謝聖母。生我快樂之原。昔如德亞人^{△△}以如第德[△]及藹斯[△]得爾之力。出免於難。獲享平安。上下同心。歡喜慶賀。吾儕以聖母而出自幽暗之苦。獲享光明之樂。不



更當感激歡欣。稱頌聖母之宏恩乎。


祝言 聖母。汝昔日甫見聖婦依撒伯爾。聖若翰。卽喜不自勝。在母胎踴躍。汝能變人之憂苦爲快樂。汝於耶穌而後。爲我等之依望。我縱不能卽與天朝神聖。見爾令容。謝爾厚惠。然願常念爾之功德。思爾之美善。聖母。我今以感恩之心。孺慕之情。歡呼曰。我手可折。不能忘汝爲慈甘之母。我舌未乾。終不能已于讚汝之聲。聖母。望爾永爲我之歡樂。我樂之緣。爲我等祈。

妙神之器爲我等祈

精匠有利器。乃能得心應手。製造奇妙之工。人於天主。亦如器之於匠。故聖經稱保祿宗徒爲主特選之器。身體結合靈魂。亦猶其器。用以立功修德。敬主助人。神靈本尊於形體。故人之身愈貞潔朴直。愈近神體。亦愈爲尊貴。超性之事。尊於本性之事。故人之身愈能附加超性之意。而行本性之功。亦必愈爲尊貴。聖教會以妙神之器之句。一頌聖母爲天主聖神之器。創成奇大之功。此意言之已屢。今不復贅。一讚聖母之身。爲其靈魂之器。聽受使用。奇妙如神。尊貴超出本性之上。此意亦大可資人思想。夫聖母生無原罪。并無私慾偏情之擾亂。其肉體自宜如元祖在地堂時。未犯罪以前。服從神靈。一如神靈之服從天主。無絲毫之拂逆。善人之身。復活而後。與神體相似。不復阻礙靈魂。聖母之軀。爲

耶穌體血之所由生。自宜預沾此恩。毋致阻其神靈。結契天主。聖利高烈引步。斯島之說。謂聖母於起居動作間。外行有殊。而中心愛主。瞬息不間。聖盎博羅削。聖伯爾納定等。又謂聖母睡時。心仍醒悟。恒發愛主之情。倘聖母之身。如常人之身。能若是乎。

依聖奧斯定之意。耶穌之體。當由聖母之體而成。自宜特受奇恩。肖似神體。使靈魂結契天主者。身亦依己所能。附合於主。聖奧斯定又曰。身為天主所聖。最親降生之天主者。不但不阻其靈魂。趣向天主。更大加輔助。賢士利藹爾孫。惟克曰。聖母之外貌。一如內情。肖似天神。此明顯其神靈與主親密無間。身之視聽言動。一如靈之意念愛慕。莫不以聖子耶穌為目的。惜吾人大不類聖母之芳型。重視虛暫之物。厚待嬌柔之身。貪求污穢之樂。一若死後無永遠真福可



望。任肉身之阻抑。隨世務之牽纏。不記憶主事。不專務神工。惜哉。自今而後。當勉爲內修之人。聽聖保祿之訓曰。種於神。乃能收穫永遠之命。我縱不能有聖母之特恩。於形身之內。度天神之生命。毫無情慾之擾。然亦當克治肉軀。斷絕邪樂。謹避犯罪之機。庶可保守神形清潔。易於對越天主。

祝言 聖母。天主於爾始胎時。卽造爾爲潔淨之器。及聖神降臨汝心。以汝體血。成聖子降生之體。拔爲天主之母。而汝之純淨神妙。至矣極矣。卽汝本性形體諸事。外視之與常人不甚異者。亦皆爲超性奇妙之工。我今稱揚爾純全超越之生命。亦願克制肉身歡樂。重顧靈魂精義。庶可將來爲天朝有用之器。聖母爲我轉求天主。賞此寵恩。妙神之器。爲我等祈。

可頌之器爲我等祈

靈魂爲天主之肖像。肉身與之結成人。爲肉身之大榮。凡靈被主恩寵愈多者。肉身亦因之愈貴。如器皿然。內藏之物益珍。器亦益貴。今聖母之靈。至潔至聖。被主恩寵。至富至奇。于耶穌聖靈而後。當推第一。聖母之身。承受之。與之合爲一人。非爲其甚大之榮乎。然更思聖母之身。懷孕天主聖子。爲天主之母。尊高不可思議矣。昔天神代主顯現於亞巴郎。亞巴郎厚款之。交接之。以爲大福。然天主並不與亞巴郎結合也。梅瑟於雪乃山與主面語。其榮大矣。然天主亦未與梅瑟結合也。雜蓋與辣匝祿等。曾款接耶穌於家。得與交好晤談。至爲榮幸矣。然皆不能比聖母之於耶穌。體血相通。有母子之情誼。聖教會定貯藏耶穌聖體聖血之爵盤等。當以金銀製成。特加敬重。不准無神品者携觸。然此金



銀之器雖尊寶。亦不能比聖母之身。親懷聖子。以己體血成耶穌之身。故聖母之身。真爲天主特重之器。宜乎天主格外珍愛。勿任其死而朽壞。三日後卽令復活升天。永爲天朝神聖之歡欽。

美器置設高堂。動人稱羨。亦爲主人之榮。若此器而係主人親製之手續。爲榮亦更大。今聖母出自天主之手。備飾本性諸奇。超性特寵。洵爲至完美之器。天主見之。亦若心滿意足。大可顯己榮光。神聖見之。更驚羨不已。讚頌主之全能。上智至愛。造此至珍寶器。永爲天堂之美飾。聖教會聽主默啟。明知此理。故恒尊頌聖母。超出神聖之上。我今默思此意。稱頌聖母而外。當憶聖保祿。宗徒之訓喻。謂如一巨室內。備設諸器。有金銀者。有泥土者。有樹木者。或爲體面之器。或爲鄙賤之器。世界上聖教會中亦然。有貞義謙愛等人。爲功德瑰琦之器。有

奸邪貪驕之輩。爲志行污穢之器。然器之貴賤。雖關質料。亦看其功用之如何而別。用於尊貴之事。則爲貴器。用於卑賤之事。亦爲賤器。故聖保祿囑人潔除罪惡。乃可爲聖善光榮之器。聽候天主使用。

祝言 聖母。我蒙天主選拔。受過聖洗。有主聖寵。爲主義子。又頻領聖體。於我心內。如爾昔日納藏至尊至貴之主。豈可不知自重。妄加賤褻哉。然聖母。我悟易昏。每爲虛榮錮蔽。我力甚弱。易爲邪樂牽連。故屢致污辱身心而不惜。今求聖母加我神力。使我持身常如脆薄之器。內藏無價之寶。謹慎珍重。再不致受污受損。可頌之器。爲我等祈。

聖情大器爲我等祈

聖情者卽熱心事主之情也。聖多瑪斯以愛欲爽快。奉行敬主之事爲熱心。聖利高烈謂聖母所以特見愛於主者。以此也。聖母祈禱。最爲懇摯。與主結契。最爲親密。潛居一室。意不外馳。心無他念。惟思對越天主。事奉聖子。身勞心怡。思念無不潔淨。意願無不正直。衷情至爲熱切。言行至爲聖善。無片刻之失檢。度量至爲廣大。爲主榮光。無不肯爲之事。福哉。日路撒稜聖殿。聖母幼時居汝廊下十餘年。能爲我一道其熱情奧義乎。納[△]匝[△]肋[△]室爲聖母與耶穌久居之所。數十年間聖母敬禮之儀。感戴之語。恩愛之情。恒向耶穌而發。如葵之向日。汝聞之熟矣。見之屢矣。宜乎宗徒而後。常有人趨赴瞻禮。徘徊思歎曰。此乃聖子降孕之處也。此乃聖母祈禱之所也。此乃聖母作工之房也。觸目情生。不忍離去。

惜我不能躬詣聖地。快予孝思。

自耶穌升天後。聖母偕若望宗徒居日路撒稜十數載。虔禱思道。日領聖體。與聖子神契心通。至死期日近。見主愛主之情。更迫不可止。聖人謂聖母熱愛猛發。身不能支。遂一息奄奄而終。若此熾愛之情。豈人之筆舌能稱述哉。昔藹斯德爾皇后尙敢謂天主曰。主。知爾婢女之福樂。惟在於爾。達未聖王云。讚主之言。常在予唇舌。又熱歎曰。我天主。何時能至爾臺前。享見爾容。聖保祿謂我活非我自活。然耶穌活於我。我真情切願。恨不能速離此身。永結於主。聖方濟各沙勿略愛主情深。致體疲倦。連呼足矣足矣。聖人之於天主。尙如此熱愛多情。況聖母夙稱爲聖愛之后者乎。聖伯爾納多曰。愛主之心。通透聖母之靈。賢士利加爾道嘆曰。熾愛天神。能自天下降。至聖母心中。學習愛主之德。聖伯爾納



定。謂聖母愛聖子之情。出衆神聖之上。噫。聖母於天主。何其情意懇切。心神怡悅哉。聽其感頌天主之言曰。我神無任忻愉於救我者。可知矣。夫此熱情。至爲有益。爲諸善功之依賴。憂苦中之安慰。失望者之神力。引罪人悔改。加善人恒心。皆有賴乎此。望主亦賜一星之火。熱我冰心。庶能於事主之途。捷行無滯。祝言。聖母。爾爲奇妙之器。充滿主之愛情者。賜我成爲真熱心之人。不必神情喜愉。感極流淚。然能辭絕邪樂。一心善備。樂行主旨。足矣。聖母。天神稱爾爲滿被聖寵者。聖教會呼爾爲聖情大器。請視我心。空空如也。不但無聖德熱情。恐亦無主寵愛。求爾聖愛之火。灼熱我心。使能不爲俗情所誘。常行天主聖意。聖情大器。爲我等祈。

玄義玫瑰爲我等祈

聖經稱瑪利亞爲緊閉之園。聖伯爾納多曰。於此園內。天主栽諸名花。爲聖教之榮飾。如謙遜之地丁花。潔淨之童貞花等。皆清香撲鼻。幽艷宜人。然於諸花中。聖教會特選玫瑰以稱頌聖母何哉。蓋玫瑰爲花中之巨魁。清雅芬芳。令人見之心悅。嗅之氣舒。非他花可比。表聖母爲天主特出之功。諸神聖之后。全美無玷。充滿德寵。天主見而欣喜。天神見而驚訝。非他神聖能及。聖母爲玄義玫瑰。雖生於濁世。從未爲邪風所中。野草所蔽。減其幽香。損其華美。玫瑰生於棘茨中。表聖母一生多苦。仿效耶穌。且由是而知人困苦。憫憐益深。聖盎博羅削向聖母曰。汝毫無傷人之處。盡是慈憐之跡。聖伯爾納多亦對聖母云。於汝有何威厲之狀。足啟人畏懼。阻人依信哉。汝待衆一體慈善。不分彼

此。又謂人曰。請汝徧誦聖經。嘗見聖母責人一語。或稍示威容否。倘能指出聖母一事。相反溫良寬和者。我不再講論聖母矣。然此玄義玫瑰。汝欲聞其德香。沾其恩澤。當勿爲世之惡氣所迷。淫風所蔽。如悅人讚美。嗜俗污樂等是。然此皆如茅徑中之草花。早開暮落。其氣猶毒。求之何益哉。當知萬物皆爲引人歸向天主。不可心沉於物。若爲己之終向。宜學聖依納爵。勞效來聖女瑪大肋納。巴齊等。遇見一花一草。卽舉心思想天主。激發愛情。又憶人靈亦爲天主之園。本不少嘉種。惟當慎防五官三司。勿任邪念出入。又時加墾種。沃之肥之。乃能發生美花。蒙天主賞識。

祝言 聖母。汝爲日理各之玫瑰。汝德行之花。如玫瑰之生於河邊陰涼之處者。茂盛出衆。芳美絕羣。於汝言行中。發出耶穌之天香。令人聞而欣羨。汝聖德

之芬馥。勝於上品香料。於此荒涼世上。惟汝爲受選之花。可供奉天庭而有耀。可敬可頌者。上天玄義之玫瑰。我願聞爾馨香。奔隨爾後。今不能盡識汝之珍美。讚之相稱。惟望後於天上。見爾令容。聆爾福音。聞爾德馨。與諸神聖頌揚爾之奇妙於無窮世。然欲至此境。先當效爾芳表。保守清貞乃可。聖母。尙其佑我。玄義玫瑰。爲我等祈。



達未敵樓爲我等祈

昔達未聖王於西宛山上造一堅固樓臺。滿裝軍器。安設精兵。能守能攻。敵不敢近。聖教會以此句稱讚聖母。一依聖伯爾納定之意。表聖母之尊高。因西宛山爲日路撒稜至高之處。敵樓建於山頂。更高插雲霄。表明聖母。蒙主超拔到至高之德位。耶穌人性而後。無有在其上者。聖額我略解達未聖咏厥基建於聖山之巔一句。謂指聖母初得恩寵。如已在高山之上。他聖人臨終時亦不能抵至。二因達未於西宛山建造之敵樓。至爲雄壯堅固。足以保護日路撒稜全地。表聖母爲聖教會之敵樓。摧敗羣仇。輔佑聖教合會。聖母本爲達未之後嗣。如昔聖王由牧童而升爲大王。聖母以主之婢女。而拔爲主之真母。贊襄耶穌救贖普世。創設聖教。功垂永久。今在天仍默助教會。挫折魔鋒。保信德之理。抵

異端之攻。真爲不能勝之敵臺。聖教會之生命。聖文多辣嘆曰。聖母戰勝獄魔。何其有力也。比整肅之軍。更爲可懼。又曰。瑪利亞。爾誠爲不可破之干城。爾可與儒弟德同呼曰。攻打我民者。真爲可惜。蓋全能天主。將起而衛護。代爲報復也。

聖母爲聖教會之敵樓。故攻擊聖教會者。卽攻擊聖母。試看自古至今。諸異教所傳之謬理可知矣。然聖母攻斥異端。傳解真道。不稍退讓。有固執不肯改悟者。寧令聖教會嚴加絕罰。逐之於外。俾耶穌所傳之真道。常存不變。故聖母日課中有云。童貞瑪利亞。請爾歡樂。惟爾滅諸異端於普世。更可奇者。特敬聖母之國。如依斯巴尼亞。意大利。比利時等。聖母亦另加輔佑。不任其受異端之毒害。又敵樓爲合城之蔭護。吾儕有聖母之輔佑。三仇之攻雖酷。惟當慎勿他適。

卽勿忘棄聖母。必無敗亡之患。今當感謝天主及聖母。幸入真教。得信德光明。知超性道理。惟與外教及異端人往來。宜加意謹慎。勿但使己之信光。不爲撫蔽。更當引人歸向真主。信從聖教。爰求聖母曰。

祝言 聖母。汝爲真實之母。攻敵異端。宣明正道。使聖教之信德。終不動搖。爾爲精明之軍師。打破獄門。摧毀魔壘。開拓耶穌之國。廣揚聖教之名。爾爲不能敗之敵樓。托汝覆庇者。皆得生全。聖母請爾垂視聖教會。引之出險入夷。求爾輔我於三仇之攻打。損失信德之險危。特於我臨終時。永遠攸關之際。望加特佑。一得全勝。乃可永讚爾之德能於天國。達未敵樓。爲我等祈。

象牙寶塔爲我等祈

聖歌上讚美淨配曰。爾頸如象牙之塔。淨配乃耶穌之肢體。聖教之像。有耶穌爲首。有聖母爲頸。耶穌加於教友之恩寵。皆經聖母之手。如飲食之由頸而下。保養全身。聖伯爾納多曰。諸生命之寵。由基利斯督錫於教會者。皆經聖母。又象牙之塔。爲美麗堅固之物。聖母心純志堅。光輝發越。見愛於主。爲魔所畏。聖教會稱以此名。至爲得當。然此意上已思及。今請以象牙寶塔之象。默想聖母受內外諸難。而心志不移。以作我恒心事主之表。

聖母一生如何忠心於主。雖苦不辭。略提一二可知矣。自幼爲聽天主之命。離棄雙親。在堂雖適素願。究不如居家之樂。年約十四。又逆己素志。于歸若瑟。及聖胎日顯。若瑟憂疑。聖母以謙下爲懷。不容明言受孕之來由。然心尤耿耿。難



以爲情。迨產期將近。離去家鄉。長途跋涉。至白冷郡。無逆旅可投。宿於山郊茅屋。產生耶穌。不得已眠之於馬槽柴草之上。傷心何如。未幾又聞聖西默盎之預言。耶穌將爲衆失所集之鵠。利刃刺心。由此而益深矣。逃往厄日多行路艱難。棲居數載。人地生疏。衣食俱艱。倍形困苦。耶穌年十二。同赴京都瞻禮。歸時相失。三日徧尋。不見踪跡。憂苦更難言喻。自後見聖子勤勞手足。爲梓人工。傳教時母子分離。不能屢相會遇。又屢聞人侮謗謀害耶穌。知終不免於死。及立在十字架傍。親見耶穌身無完膚。死於兩盜之中。而聖母之堅心忍性。真可謂如象牙之塔。高矗於海洋之中。雖被狂風大浪衝擊。仍穩定不搖。且光潔益顯。真爲吾人於患難中之善表。教友爾當諸事順適時。亦甘心事主。盡分不懈。然一值艱難。或當捨却不義之財。或宜斷絕不正之友。或遇人毀謗。或生何疾病。



恐卽立脚不住。不肯堅志壹意。寧捨諸利樂。遭諸艱難。以歸向天主矣。今思聖母之表。當效其不論遭何困苦。不但不灰心變志。更視爲補贖之資。功德之機。去自滿之心。增恃主之德。加天上之榮。何幸如之。至論汝熱心之靈。倘於修德之途。覺乾枯無味。幽暗不明。亦當仿效聖母。竭盡心力。不輟善功。終有一日。主將親拭汝目之淚。使汝明知憂苦較神樂。更有益於靈。主因特別愛爾而加焉。祝言 聖母。汝德行之光輝堅實。愈於象牙寶塔。我恒將於爾是望。視爲我救命之臺。恩寵之庫。用以抵三仇之攻擊。勝本性之柔靡。聖母。遇內外逆難。而爲善如常。事主不變。固爲無價之恩。然亦屬不可少之事。我故有求於爾。至終不息。獲爾大能之庇佑。乃可履險如夷。終無失望之患矣。象牙寶塔。爲我等祈。

黃金之殿爲我等祈

古教時撒落滿王。於日路撒稜飭造一殿。以數十年之預備。費數百萬之價值。而告成。基址雄壯。物料堅美。工程精緻。氣象崇華。真可爲天下之奇觀。古今之瞻仰。聖經欲甚言其富麗。謂於殿內。無一物不以純金裹飾。故稱爲黃金之殿。聖教會以此稱呼。讚美聖母。因聖母爲天主親建之殿。富於德寵。比金尤貴。聖多瑪斯曰。於撒落滿殿。無物不裹以真金。於聖母瑪利亞。無事不充滿聖德。聖母未懷聖子以前。天主聖神如精明工師。富財主翁。先構完美之模樣。然後不惜資本。依樣製造。快心而後已。聖母又善於迎承聖旨。絲毫不忽。故所有意念。所發言行。皆於天主目中。勝兼金之寶。若此者十餘年。至天神來報時。聖母已滿被主寵。德修完美。天主聖子乃慨然降孕於其胎中。住居九月而不厭。宜乎

稱爲黃金之殿。


金之淨者。毫無泥滓。華美之殿。以清淨無塵爲首要。聖母純潔無玷。細過勿沾。故堪邀主降顧。金爲愛德之象。愛爲聖德之圓滿。十誠之總綱。天主命人全心全靈。全力全意。愛之於萬有之上。守全此誠者。定推聖母。蓋其自成胎始。認主最明。蒙寵最夥。感激最深。愛主之心。亦因而時常無間。熱切莫名。聖母親示聖婦彼利。日大曰。我昔在世。天主之外。別無意願。別無福樂。聖多默。味辣諾曰。聖母熾愛。感動主心。俾自天降厥胎中。爲人救世。聖母自懷生耶穌而後。愛之如天主。如親子。更衷情勃發。頃刻不忘。聖伯爾納定曰。聖母愛其聖子至極。倘能代爲之死。雖千萬次不辭。至論其愛人之德。本由愛主之心而發。亦遠出他聖之上。至肯奉獻己子。用成救贖之功。故依亞爾。備爾多之意。聖母稱爲黃金之

殿者。以金爲愛德之像。聖母爲愛德之殿也。聖母旣如是愛主愛人。稱爲美愛之母。又知愛德之緊要寶貴。必願吾人亦盡心保守。日漸增加。故慎勿故犯大罪。以喪失之。忽於小過。以減抑之。然全心全力。奉行主旨。專意祈禱。勤領聖事。奮修謙遜貞潔。克苦哀矜諸德。以保守身心。斯愛德常爲汝靈之美飾。汝靈亦若黃金之殿。主見之。惠然肯臨。樂於居住焉。

祝言 聖母。我聞爾聖子之言曰。人若愛我。必守我訓。我父亦愛之。吾儕將就彼。與之偕處。聖母。以爾轉求。望主此言。承行於我。天主樂居爾心。勝於昔日撒落。滿所造之殿。求使我心。亦堪爲天主之殿。謹慎閉守。不被塵污。富飾功德。光輝悅目。愛情之火。常焚不息。祈禱之香。時刻上升。聖母。汝至愛耶穌。切願人皆愛之。此正爲我所求之寵。恃爾轉禱。必得無疑。黃金之殿。爲我等祈。

結約之匱爲我等祈

聖經所稱之匱有二。一爲諾厄之舟。聖利高烈引藹斯急之言。謂聖母之爲匱。大於諾厄之匱。自伸論曰。於諾厄之匱。所救畜牲。各類惟一對。而居於聖母之匱者。不論多寡。賴其蔭庇。悉得生全。聖利高烈又曰。進諾厄之匱者。畜類仍爲畜類。罪人而入聖母之匱。則被其默佑。變爲義人矣。二爲古教中依撒厄爾民結約之匱。上章所言黃金之殿。固爲聖母之像。然結約之匱。更足以表章聖母。結約之匱。由瑟丁木製成。是木最爲堅硬。不能朽爛。表聖母生無原罪。終身不染罪污。死後肉身亦不朽壞。結約之匱。內外裹以金皮。匱蓋平如臺桌。亦純金鑄成。蓋上有熾愛天神兩像。亦係金質鑄造。置於兩頭。展舉雙翼。遮護蓋面。天主有何旨意。告依撒厄爾民。恒在此處。因亦稱爲施仁之處。聖母爲新教內結



約之匱。天主滿以寵恩。飾以聖德。舉於高位。爲天主施仁之所。爲降生天主之聖龕。自此宣播訓言。沛加恩澤於天下。

於古教結約之匱內。所貯者惟瑪納亞郎之杖。及十誡兩石板。然於聖母匱內。藏頒誡之真主。生命之神糧。又聖母以童貞而爲天主之母。奇妙更勝於亞郎之枯杖。開花結菓。天主於古教時。爲啟人敬重聖匱。數顯靈奇。失敬者受罰。致禮者納福。今若有人輕褻聖母者。天主每卽加顯罰。人跪伏於聖母之前。而拜禱其所懷之子者。無恩不能沾得。昔達未聖王。迎結約之匱。進日路撒稜爲聖母榮召升天之像。吁聖母。聖德之匱。由地上升。置於耶穌之右。諸神聖之上。幸勿棄我下賤。請示爲母。然恐聖母將答曰。請示爲子。故我若勉爲孝子。聖母必更顯其爲慈母也無疑。

觀言 聖母昔結約之匱爲依撒厄爾之開導勝仇敵之攻分古爾頓河之水。引民安進加納翰福地。汝爲天路之引導。有汝在前。人類之虐仇。定將敗走。世海之橫流。且行分息。而人可以穩達天岸矣。古教時天主與亞巴郎依撒格亞各伯及依撒厄爾民所結之約。固爲主之大恩。然豈能比天主於汝胎中。降生爲人。與我人永遠之約乎。聖母。諸恩惠皆由汝而降。助我亦忠於所許之約。主必不失信於我。在世賴主優寵。以免罪立功。死後得享永福於天國。結約之匱。爲我等祈。



上天之門爲我等祈

耶穌曰。我爲門。不經我者。不能詣聖父前。今稱聖母爲上天之門。不以耶穌之榮。加於聖母乎。曰否。聖教會爲真實之師。定不忘聖經之訓。惟一天主。惟一耶穌。基利斯督救贖吾儕。爲人與主間之中保。操審判生死之權。定永遠賞罰之案。然因聖母之榮光。悉歸耶穌。如歸己終向。聖母之大能。從耶穌而得。代耶穌同耶穌而行。故聖教會稱聖母爲上天之門。不但不損耶穌之榮。更彰耶穌之功。如昔日耶穌因聖母而降生於世。顯己慈善。救贖斯民。復人超性之生命。示人升天之道路。今耶穌亦欲因聖母而領人升天。同享永福。故於此一句。寓敬聖母爲升天之兆之大道。人生至有關係之事。日常當三致意焉。

聖母爲上天之門。因恒心誠敬之者。聖母仁慈必不忍其死於大罪。而下地獄。

質言之。眞敬聖母者。必入天門。此理一可証。以聖教會所引之經典。作成讚頌。祈求聖母之文。二可証。以聖師之公同意見。經云。聽我言。日侍候於我門者。爲眞福。無論誰何。尋獲我者。卽獲生命。聽我者。終不受辱。光榮我者。得享常生。似此諸語。本指天主上智而言。然聖教會每取用於聖母經中。若設爲聖母之詞。倘敬求聖母。與救靈升天。無密切之關係。聖教會之言。不若虛誣矣乎。至論先聖深得聖教眞旨。講論此理。亦不謀而同。又推究其故。謂非然者。耶穌與聖母共艱苦。而不與分光榮。爲無情之子矣。且耶穌旣於十字架上。定己母爲吾衆之母。旣於天堂置聖母於己座右。報以至大之榮福。倘聖母而不能悉遂己願。普救衆人。不若於榮福中尙寓缺點乎。天主之功。至全至稱。定不若此。故諸聖賢俱謂人得聖母之瞻顧轉達者。無一不得升天。今惟畧提一二。以免沉長。聖

奧斯定曰。聖母以己愛情。助耶穌生人神靈之命。諸信友爲耶穌之肢體。亦爲聖母之子女。是故聖母光照之。輔佑之。振勉之。非真自甘暴棄者。皆可得永福。聖文多辣曰。無一人不經聖母之門。而能進天堂者。又曰。得聖母之慈佑者。已可稱爲天國之人。恭敬聖母者。其名已書於常生之冊。我今思此道理。當自問良心。真有愛敬聖母之心否。有則可喜可慰。感謝天主。此蓋爲受選升天之佳兆。當鄭重視之。不可輕失。然若自知尙無愛敬聖母之誠心。或雖有而甚淡忽。當驚懼不安。故自今定一善志。至死敬禮聖母。有加無已。求其寵佑。則其德表。勉爲孝子。則於本身有升天之兆。而可以安心矣。

祝言 聖母。昔聖祖亞各伯。夢見一梯。頭靠上天。脚着於地。天主於頂上預示其子孫將來之景況。亞各伯見之驚奇曰。此爲可敬可重之地。天主之宮室。上

天之門戶在焉。聖母。汝爲上天之門。不更可敬可重乎。天主由汝而降生於世。吾儕依爾而望升天。主之恩寵由汝而沛施於地。人之祈求由汝而獻呈於主。噫。俟候於爾門者爲真福。且汝之慈門常開不閉。有天神下降。施發寵恩。以之修德立功。作進門符。無患不能入矣。上天之門。爲我等祈。

曉明之星爲我等祈

聖母誕生。如曉明之星。出於東方。先發晨光。報知耶穌義德之太陽。速將出現。普照大地人民。福哉聖母。爾爲斯世之黎明。去幽夜之苦。報化日之安。聖子耶穌先降汝胎中。隱蔽數時。隨即顯現人世。照耀衆目。溫暖普世。俾皆夢醒興工。植常生之菓。試思曉星顯現。爲黑夜失路之旅人。不能熟睡之病夫。行海遇險之舟子。有如何之歡樂。而知聖母之誕生。當爲普世人民何等之喜慶矣。卽吾儕得有今日之光明。亦幸聖母。早生聖子耶穌。光照萬世。否則亦居於黑暗之中。仍賴聖母慈光之導引。而能出自罪過之影。獲聖寵之耀。妄行升天道路。噫。人誰不知於事主之途。有時遇險危之景。性理信光。幾爲似是而非之黑影所蔽。私慾偏情。又若無繮之馬。橫不可制。強愛欲遂其所好。像司又施其伎倆。致

本來憎厭之事。亦若喜得悅從。際此光景。當舉爾目。望聖母之福星。求其垂視。必覺和光煖氣。自遠而至。漸次復得昇平之象。亦有時人於神業諸功。覺昏暗不明。厭怠無味。灰心失志。幾至盡廢前功。倘求聖母之光照庇佑。未幾靈明開發。心地安寧。神工復有興味。且恐比前益盛。聖伯爾納多曰。於此世上。不論遇何風波。止須仰求福星之佑。永無覆溺之虞矣。

若有人尙居於死罪之內。幽暗之中。卽靈無天主寵愛。而有敬母之心者。不久將見愛日上昇。復得主寵。聖若望大瑪瑟諾稱聖母爲報日之星。聖利高烈仲解曰。曉星先日而出。敬奉聖母之心。爲得主聖寵之先兆。聖日爾滿曰。愛敬聖母。爲有主寵愛。或將得主寵之記號。我今特當懇求聖母。驅逐幽魔。勿任其肆害。如黎明甫起。獸皆歸穴。不敢外出。又渡此險海。當求聖母爲舟師。引我出諸



聖母禱文疏解…

曉明之星爲我等祈

百三十四

危難。穩抵常生之域。

祝言 聖母。我聽聖伯爾納多之訓曰。爾爲常明之星。恒加安慰助佑。隨汝光照者。終不入歧途。求爾輔引者。終不失所望。倚汝德能者。不能顛覆。有汝指引者。可以無懼。不覺苦勞。有汝福佑者。必至所願之處。如海星導行海者。穩進港口。汝引教友安至榮福之境。聖母。我靈若一葉扁舟。浮沉於汪洋大海之中。時覺愁雲密布。淫風大作。俗浪冲天。然賴爾導引。可望起程吉。繼程樂。終程安。順行至天堂福岸。讚揚爾之恩德於無窮世。曉明之星。爲我等祈。

病人之痊爲我等祈

疾病爲斯世最多之苦。鮮有人能久免者。每見人生而殘疾。困苦終生。或半世沈吟牀蓐。醫藥不周。侍奉無人。苦痛難以言狀。然於此患難中。熱心教友有一安慰焉。聖母是。呼其名。求其佑。用其聖物。數見人力不能醫治之病。頓卽痊好。蓋耶穌聖心而外。更知憐人憂苦者。定係聖母之心。聖子耶穌於十字架上。以若望之名。托吾衆於聖母。聖母此時若於憂苦中。生吾衆人。爲吾衆之母。誰爲母而不憐其患病之子乎。是故信人病且劇。求聖母而獲生全者。何在蔑有。人非親值之者。每親見之。或親聞之矣。茲不必多述。止以法國露德[△]一地言之。四方來求痊之病人。經名醫審視。非醫藥能愈者。聖母忽然愈之。年每數人。或數十人。至露德[△]聖水寄出各方。療治病人。更不可勝記。又聖教會中不少各種病




院。有侍理病人之修士修女。有願望病人之慈善教友。每因事奉之殷勤。片言之勤慰。提及聖母。代禱聖母。而病者心地安舒。漸卽痊好。此雖非顯明靈跡。亦可歸功於聖母焉。

然以人身之強壯。非常爲靈魂之盈。有時亦能致害。且人終不免老而死。老時死前慣有病痛。疾病本亦天主恩賜。可以煉人罪過。加人功德。使人脫除世樂。嚮慕天堂。故汝若身多疾病。懇求聖母而仍不療愈。當知仁慈之母。必加汝神力。賜汝忍耐。安聽主命。能於痛苦中。補罪立功。備榮冠於天上。古聖若伯曰。於我困苦中。有此安慰。卽知主不寬假我於今世。我亦不背逆其聖旨。汝若能如此。忍受病痛。必功日增。德日盛。日益見愛於主。及終期已至。自然毫無畏死之狀。戀世之心。快離現世之苦。往享永福之報矣。故我不論有何病痛。常以依恃



之情。奔赴聖母臺前。求其助佑。勿忘聖伯爾納多之訓曰。天主置全能之權於聖母之手。我之生死。在其掌握。特當求其勿棄我於臨終時。永遠禍福攸判之頃。并佑我活於世上。常如臨死之末日。善備以待。

祝言 吁。聖母。汝之心比聖保祿必更慈憫。不若借其辭。語人曰。誰受病苦。而我不與之同受者。我稱讚爾之仁慈。憐憫患病之人。或愈其疾。或賜其忍。昔日路撒稜有一洗牲池。每年一次。天神下降動水。首先入池之病人。得卽痊癒。聖母。汝爲活水之池。常能醫人百病。聖史路加記汝聖子耶穌在世時。有神力發出。療治諸病。今其神力若由汝而發矣。聖母。特求爾轉禱耶穌。矜憐我於病重臨終之時。聖熱羅尼莫訓人曰。依恃汝者。汝以慈母之心。接受之於死時。先由爾手。療愈我靈。然後可以死而瞑目。見主無虞。病人之痊。爲我等祈。



罪人之托爲我等祈

依人本性。得罪一人。必畏見其面。倘其人品位益尊。權勢益大。并曾大有恩德於汝者。而汝觸犯之下。卽欲到其面前。表汝悔改。求賜赦免。亦必退懾不前矣。若逢一友。素爲此人所信重者。願代爾求恩。爲爾中保。幸如何之。若卽其人之母。憐汝不幸。爲汝轉言於己孝子。更何樂如之。犯罪教友。汝卽此不幸之人。汝辜負耶穌之恩惠。忽其愛情。犯其尊威。雖悔恨往過。恐不敢直至其前。求其寬赦。幸有聖母瑪利亞在。願爲爾轉達聖子耶穌。求其開恩。與爾復歸於好。故不論汝犯罪至多且重。總不當失望。有聖母全能之轉求。必能得汝罪之赦。聖母慈母之心腸。汝若恃之。必肯爲爾矜全。蓋如人家。弟兄有隙不和。爲其母者。必設柔硬諸法。必能遷此就彼。使兩釋怨恨。重相親愛而後已。聖母爲耶穌之母。



亦爲吾衆之母。人犯重罪。未悔以前。固不能與耶穌和愛。聖母一面先緩阻天主之罰。求施格外之佑。一面催勉罪人。及早離棄惡孽。真心痛悔。則若兩弟兄復相和好矣。且天主原不欲罪人死亡。而欲其悔改。耶穌爲救贖罪人。而生於斯世。死於架上。亦爲救護罪人。而定聖母爲吾衆之母。聖母與耶穌周旋數十載。盡識耶穌之慈心。耶穌在世時。樂與罪人往來。慈祥特著。稱爲罪人之友。一日宴於瑪竇家。或竊厭之。耶穌曰。醫醫病者。無病不求醫。法利塞俄等欲舉石擊死淫婦。耶穌設法救之。瑪大肋納素行不潔。一日垂淚濯耶穌足。耶穌宥其往愆。卒成爲熾愛聖女。右盜終生作惡。臨死一言請托。吾主許以卽日同享天福。爾想耶穌之仁衷。不與聖母相通乎。今聖母在天。豈變其憐憫之心乎。聖文多辣曰。聖母仁慈同榮光俱增。今與耶穌同在天國。見人之苦。更爲明切。憐人



之情亦必更大。諸聖人於此一事。衆口同詞。言之至乎其極。聖日爾滿曰。聖母常開慈懷。收納罪人。聖奧斯定呼曰。瑪利亞。汝爲罪人獨一之望。聖文多辣曰。吁。瑪利亞。罪人雖被衆憎厭。汝終不棄絕。仍以慈母之心收留之。矜憐之。直至與嚴威之判主。輯和而後安心。我今感謝天主。賜此仁慈之母。哀恤犯罪之人。我信托之。依望之。求其轉禱。赦免我罪。求其加恩。感化他人。不論神形困苦。卽遇失望之誘。仍勿失望。聖母之救。同聖教會呼曰。申爾福。仁慈之母。我等之生命。我等之怡。我等之望。

祝言 聖母。昔聖伯多祿在若白地。一日神情超拔。見一器滿藏污獸。以主全能。頃刻間變爲潔淨之物。拔諸天上。污獸正爲罪人之像。汝容納之。感化之。去其污穢。而置之天府。古教時有救命城。不幸犯法者。逃入城中。刑罰不能及。汝



爲罪人之託庇尤勝於此。屢次天主因人之罪。大發義怒。欲加重罰。以汝轉求。而得挽回。汝不輕視人之微工薄意。每因一遍之經。細小之勞。救脫之於下獄之險。聖母。汝真爲罪人之托。無有呼求爾佑。而被棄拒者。然有多數罪人。勿知爾仁慈。勿求爾輔助。真可嘆惜。聖母。似此諸人。亦爲耶穌聖血所贖。爲聖教之肢體。爲吾儕之弟兄。我今以聖教會之名。代衆呼號曰。天主聖母瑪利亞。爲我等罪人。今祈天主。及我等死候。又曰。罪人之托。爲我等祈。



憂苦之慰爲我等祈

昔撒落滿王。可謂享盡世福矣。尊爲天子。富有四海。權能施及遐邇。才智超絕。古今爲王數十年之久。合國昇平。萬民敬服。卽普世前後帝王中。恐無有能比其榮樂矣。然其晚年。閱歷之下。并因天主聖神之默示。歷數諸般榮福之後。連加斷語曰。此皆虛而又虛。無非傷心鬱意之事。信哉。元祖犯罪而後。斯世成爲涕泣之谷。雖非各人遭一式之苦。又概想他人比己有福。然實無不各有苦景。內而智昏慾擾魔誘。非時加猛省。勉力抵制不爲功。外而俗累家寒。災病勞辱。無一非苦。誰見一家完全無缺者。有貨財而無子孫。有子孫而不良無能。良矣能矣。而疾病夭亡。或上下不睦。每見極大之喜。爲小不幸所泯。一身多愁。至終不免於死。噫。生於世。非可哭可泣事乎。



天主亦知其然。雖依己上智。因人之罪。爲人之益。不欲變此苦境。然於痛苦中。亦時加安慰。故聖經稱天主爲安慰之主。迨耶穌生於世。親當諸苦。以慰人之苦。望日路撒稜城而揮淚。見辣匝祿死而悲傷。對衆勞苦負重之人曰。咸來就我。我將撫慰汝。升天後又遣聖神降臨。爲貧乏之恩主。憂者之慰。苦者之安。然天主雖最憐憫。仍恐人畏其威。恐其義。不敢近前。故特定一人。爲已施慰之代表。瑪利亞是。有仁婦之心腸。兼慈母之哀恤。又親自經歷。知人困苦。受主托付。有主全能。儘可撫慰吾衆於各等窘難。稱之爲憂苦之慰。極其得宜。噫。聖母。汝誠如聖保祿所云。與哭者同哭。當在憂難之中。呼憶汝者。自覺心泰氣舒。易於忍受矣。想汝至聖天主之母。向一生多苦。過於致命。然恒心忍受。契主聖意。不怨不尤。而我卑微罪人。當受地獄之刑者。遭些艱難。仍爲我益。卽不肯平心勉



受乎。又誰於千愁萬難中。想汝仁慈之母。見我流淚。聞我哭聲。雖不顯然扶助。然必不讓我徒苦無益。思念及此。不稍覺快慰於心乎。世間憂苦之緣。或係外面之逆難。或係良心之不寧。遇外難而呼求聖母者。聖母每設法解救。或賜其堅忍。勿至過於傷心。至良心之刺。神靈之病。更爲痛苦之由。聖母助之亦更切。必引罪人悔改。心境平安而後已。故真福蘇宋稱聖母爲罪人至忠信之安慰。聖利高烈曰。人將已傷處。指告聖母。聖母卽代爲祈求。治其傷。慰其憂矣。故汝不論有何神形患難。速當奔赴聖母臺前。求其安慰。呼其救援。聖母必不負汝所望。聖若望大瑪瑟諾曰。聖母解人憂苦。至爲甘怡。治人神病。至爲靈驗。聖安多尼曰。無一聖憐人窘苦。可比童貞瑪利亞。

祝言 聖母。汝爲我在生之安慰。困苦中之盼望。天主欲用爾慈母之手。變我



之痛哭爲歡樂。我於憂患中。常將趨爾臺前。求爾撫慰。則雖苦猶甘。終不至灰心失望。聖母。人於斯世。定不能毫無愁慮。且受苦益多。益爲主無愛之證。我縱聖女德肋撒之熱情。求主或加勞苦。或允死亡。并無聖女瑪大肋納巴齊之神勇。請主寧緩死亡。而增勞苦。然我亦不辭艱難。惟求賜我神力以忍。愛主而當有益於靈是矣。我母。特望汝慰助於臨終之時。至大痛苦之中。迨至死後。收我神靈。引至天主臺前。領受一生痛苦之報。謝爾輔慰之恩。憂苦之慰。爲我等祈。



進教之佑爲我等祈

耶穌而外。聖母爲教友第一輔佑。蓋聖母爲耶穌之母。耶穌受盡艱難。立此聖教會。愛之如己。淨配。猶己肢體。然聖教會以教友而成。聖母能不愛慕之。輔翼之。若別一耶穌乎。故聖若望大瑪瑟諾謂聖母幫助教友。救脫諸險。常預備以待。爽快異常。聖高斯莫日路撒稜人謂聖母之助佑。爲全能之助佑。無一事不能成。聖伯爾納多稱聖母爲善戰之女。聖母保護教友。攻打無形之仇。乃日常之事。茲不多述。特言其如何輔助教友之兵。擊敗有形之仇。當聖教會第十六世。回教人招集大軍。攻犯歐洲教友諸國。計滅聖教。歐洲奉教君王。皆整兵出敵。大將若望奧忒理出師前。先求聖母陰佑。矢願往朝老來德聖母聖室。羅瑪信友羣集。公誦玫瑰經。祈求聖母。未幾兩軍會於希臘國邊境。肋榜德海峽。時

教皇聖庇護第五。在宮中與大臣議事。頃刻間。緘默不言。啟窻屬耳。若聞有聲自遠來。後匆遽返座。高聲曰。且往堂中謝主。我軍勝矣。未幾果得捷報。教皇爲感聖母之恩。詔於聖母禱文內。加進教之佑。爲我等祈兩句。又在羅瑪舉行聖母得勝瞻禮。後改名玫瑰瞻禮。

後在第十七世。回人復率兵二十餘萬。攻教兵數萬於完納城下。又以聖母之助。教兵大勝。此後三十年。總王加祿第六。又大敗回教人。未幾解高爾甫之圍。然至此猶未有聖母進教之佑瞻禮也。教皇庇護第七。在位日久。遇難亦多。被擄於外。常呼求聖母進教之佑。聖母不虛其望。法王拿破侖素與教皇爲難者。卒聲勢盡失。被革竄流。而教皇得於一千八百十四年六月二十四日。榮歸羅瑪。乃爲永謝聖母洪恩。詔定每年此日做聖母進教之佑瞻禮。然聖母不第爲




聖教合會之保障。亦爲各教友之護佑。當求其堅我事主之志。賜我善終之恩。又每遇聖教公共禍患。或某處教會大難。當視若本家切身之禍。不可敗興失望。疑主上制之措施。正宜加倍熱心。虔祈聖母。護助聖教諸人。聖安。多尼曰。世間無一事不隨聖母之命者。何故人尙懷疑。而不全心依求聖母。於公私患難之中耶。

祝言 聖母。汝爲教友之干城。有汝庇佑。無有能害我者。望汝不棄我可憐之人。振我志。加我力。解我憂。助我戰勝三仇。又求爾垂佑普世教友。聖教合會。教皇主教司鐸。使皆倚爾大能之佑。克盡己職。戰勝主仇。卒得凱旋之榮於天國。進教之佑。爲我等祈。



諸天神之后爲我等祈

后爲婦人至尊之稱。聖教會用以上諸名。讚揚聖母而後。情猶未已。又尋思元后之號。以稱頌之。又以天神爲受造中至尊之性體。聖母之榮光。尤在天神之上。故先呼之曰。諸天神之后。爲我等祈。夫天神本不屬人類。其原義從未失落。不需救贖。其本有之榮福。不依賴於聖母。故不可稱聖母爲天神之母。然天神受造於主。係天主之臣僕。聖母爲天主之母。位置超越天神。故亦爲天神之后。聖保祿宗徒給厄白來依人書第一章。証耶穌爲天神之王。其意即可類推。以証聖母爲天神之后。聖伯爾納定已先我言之矣。謂如耶穌坐於諸天高座。至尊之右。所受名號。超出天神幾何。其尊高亦超出天神幾何。耶穌之名號。係降生爲人之天主。故爲天神之王。聖母之名號。係天主降生之母。故爲天神之后。



天主未向一天神言。如向耶穌云。汝爲我子。亦未向一天神言。如向聖母云。汝爲我母。天神祇爲主之臣僕。不能如聖母對耶穌云。汝爲我子。天神之於主。欽崇拜揚。奉承差遣而已。聖母之於主。則恬然愛敬。親爲母子。故天神欽崇天主以外。自必敬奉聖母。視若元后無疑。況依超性學中可信之一說。謂當初天神受造後。天主預示以聖子將來降生。結合人性。肯謙認崇拜之者。乃得定於善。而蒙永福。然聖子降生爲人。必有其母。故聖母亦間接關及天神之榮福。而天神情深欽仰。奉爲元后焉。況無數傲神背命受罰而後。天堂爲之一空。幸聖母生耶穌。成救贖。天堂之虛位漸滿。而天神之快愉亦增。故天神外加之福。亦有賴於聖母。而拜戴之若已后焉。

至論聖母在世時。所當之職任。所沾之恩寵。所建之功德。亦遠逾天神。若日光




之比諸星。今聖母在天所有之榮福。所秉之權能。亦自然超出天神之上。若母后之於臣僕。天神拜望不及。能不竭誠企仰。無異太后哉。聖亞大納削謂瑪利亞居天主右。猶言最近天主。天神聖人。均在其下。聖教會於聖母升天瞻禮。日課經亦云。天主聖母榮登天國。擢居天神品位之上。聖厄彼法諾曰。惟天主教在聖母之上。餘皆在其下。聖安多尼曰。耶穌置一榮冠於聖母之首。致天神不得不敬爲后。予曰。聖母之光輝。廣施遠射。天神仰承照耀。快莫能言。如聖教會於聖母升天瞻禮。日課經云。瑪利亞升天。天神共樂。正不待勉強。已自然恭奉之爲后也。后有諭令之權。聖文多辣引聖奧斯定之言曰。彌額爾率衆天神聽聖母之命。聖伯爾納定謂衆天神爲聖母僕役。據是。則不論何神。一聞聖母之召。未有不爭先供令者。昔嘉俾厄爾天神於來報時。竭恭盡敬。讚賀稱揚。非因聖



母將升之高位。將得之殊榮。將執之大權。遠在天神之上乎。然聖母爲誰。而天神尊敬之若此耶。聖母爲如答族若亞敬亞納之弱女。謙卑之童貞。梓人若瑟之淨配。終生居貧樂賤。茹苦忍辱。若忘爲天主之母。是爲摶謙奇妙。千古所無。相傳聖五傷方濟各。以謙遜之故。列於上品天神之中。聖母之謙遠勝聖方濟各。宜乎位列九品天神之上。爲諸天神之后。教友從知人於世上。謙下困苦。受人輕慢。好自藏修。爲得真榮高位至穩之路。汝其勉之。

祝言 申爾福。天神之后。至尊天主聖子。由爾降生。在世甘屬爾命。天主而外。無有尊於汝者。求自上天高座。垂目憐視。遣發天神。助我於神形諸難。又賜我在世奉行主旨。如天上之神。迨我死後。接我靈魂。以爾大能之轉達。得列天神之末。與諸天神共揚爾之榮光。諸天神之后。爲我等祈。



諸聖祖之后爲我等祈

原祖犯罪後。天主卽許聖子降生。救贖人類。謂將有一女。及其子與魔爲仇。此女卽聖母瑪利亞。諸聖祖在世時。業已深信堅望。遙伸敬仰。及至聖母升天。諸聖祖早已在天等候。一時愛戴之情。感謝之意。驚奇之詞。讚頌之聲。非世人所能喻。想元祖亞當。必首先致敬。稱聖母真爲生活之母。踏碎邪魔之首。生養救世之主。所加恩寵。遠逾己罪之害。亞當而後。當推諾厄爲人類再祖。必企仰聖母爲生命之匱。救普世於罪溺者。亞巴郎。雖知救世主當由己獨子之後而出。仍不疑祭獻於主。今見聖母甘獻聖子。死於十字架。拯救世人。自覺後先濟美。感戴情深。雅各伯預言救世之主。於數千年前。今見其生身之母。不當喜出望外。稱揚感歎曰。汝誠爲由地達天之梯。榮福之王。自汝而降。犯罪之人。由汝而

升。若瑟無辜而被鬻異國。由苦辱而擢爲上相。救多數人民於飢荒之患。亦爲聖母之子耶穌之預像。今見其母。如見己慈母。不勝愛敬。梅瑟受主命救義撒厄爾民。脫厄日多國之虐政。引至加納翰福地。定立規誡禮儀。爲古教之首領。自當奇救世之母。佐聖子耶穌。救脫人於獄魔之酷虐。定立寵教之理規。示人升天之道路。

聖祖中最被聖神榮譽者。爲亞巴郎。依撒格。雅各。伯乃。主民之始祖。天主豐賜榮福。許以子孫繁盛。與之結約。救世主將由其後嗣而生。主將因之而降福衆人。雖聖祖皆信堅望切。試難備嘗。終不遠離天主。堪爲萬世之表。然比之聖母。猶影像之比實跡。遠不能及。天主於聖祖。預許救世之主。俾留傳後代。於聖母則親生其胎。同施救贖。聖祖於救世主。因統族遙連。大爲榮幸。聖母於救世主。



則血肉親傳。眞爲母子。諸古聖祖皆知聖母雖依宗派。係己孫女。然拔爲天主之母。產生耶穌。遙施救贖。故今得榮冠於天國。耶穌而外。亦感聖母之恩。自必仰戴讚揚。情不能已。又以聖母寵德榮光。皆遠出己上。能不一見傾心。拜爲元后乎。吾儕幸生天主降生之後。不必有古聖祖之盼望。已享救贖之鴻恩。聖若望宗徒曰。天主聖子。已降爲人。居我人間。惟今尙未覲面見主。故須激發信望。熱切愛事天主。昔如德亞人以有亞巴耶聖祖爲榮。今吾儕教友。卽爲如德亞人之嗣續。亞巴耶等亦爲吾聖信之祖。復有耶穌爲再祖。聖母爲母后。非更榮幸乎。今向聖母懇求曰。

祝言 聖母。諸聖祖所切望一見而不得者。汝懷之九月。與之朝夕周旋者數十載。汝之福樂。眞超越古祖。宜乎稱爲諸聖祖之后。吾儕亦幸識聖子耶穌。亦



聖母禱文疏解… 諸聖祖之后爲我等祈

百五十六

能領之於胸。謁之於堂。身心會合。何幸如之。求爾加我活潑之信。熱愛之情。庶不辜此洪恩。并可望死後同古聖祖。享見其榮光於天國。諸聖祖之后。爲我等祈。

諸先知之后爲我等祈

原祖犯罪而後。天主卽預許救世之主。又恐人年久遺忘。故代生先知。以主默啟。預言救世主一生事跡。筆之於書。初祇述其梗概。隱約言之。繼起者補前人之不足。載之更詳。卒至聖若翰。保弟斯。大出。而吾主終生行實。幾備述無遺矣。乃能一見語人曰。此爲除免世罪天主之羔羊。故先知之預言。若新經之前序。鮮有不以耶穌降生之宗旨。及其言行爲歸向。然預宣耶穌之事跡。不能不兼及其至聖之母。天主於地堂中親告之預言。已兼指耶穌聖母。爲挽救人類不可缺少。不可分離之依賴。諸聖先知中。達未。額述。基。藹。爾。依。撒。依。亞。三人。更蒙主特示。將聖母之功德尊榮。言之鑿鑿。敬仰於先。今諸先知在天堂。明見聖母之崇修高位。與已預言。若合符節。不當竭恭盡愛。尊之爲己后乎。



先知諸聖非盡晰耶穌之事。祇各知其數端。惟聖母先知之后。洞徹古經。盡悟先知預言救世主之行跡。又先知所仰望而不得見聞者。聖母親目見之。親耳聞之。并親身值之矣。先知受主默示。預揚救世主之奇異。皆超妙人神。動人心意。聖母讚頌天主一歌。更詞意懇切。感激無涯。預言世世人民。將頌己眞福一語。至今極有應驗。聖母於此歌內。又隱言耶穌將立聖教會。爲義撒厄爾民之神嗣。雖常被艱難。而常存不滅。勝諸仇敵。澤沛衆人。此言至今約將二千年。亦踐行不爽。大衆共知。鮑蘇藹曰。福哉吾人。天主本可爲所欲爲。何故預許於前。若自束手足。非欲如聖母云。將己仁恩。傳揚於世世乎。旣知天地可毀。耶穌之言不能不行。當堅我心志。增我依望。隨信光導引。勿爲世俗虛妄所迷。

祝言 聖母。汝昔依主默照。預知來事。謂後世人民。將頌揚汝福。又謂聖教會

雖迭遭窘難。恒能摧敗諸仇。終不絕滅。我見此預言。時常印証。不當歡欣莫似。頌爾先見之明乎。聖母。我亦爾子。爾僕。欲同衆人。讚頌汝之福樂。我信聖教會。常導信從之人。至常生之域。我願於言行之間。証我爲爾之孝子。真實之教友。依所信之理。向望永福而行。聖母加我寵佑。俾能踐守此志。終勿爽忘。諸先知之后。爲我等祈。


諸宗徒之后爲我等祈

耶穌升天而後。宗徒門弟數十人。概皆出身貧賤。無學術無權能之人。散往各方。宣講聖道。教人捨棄邪神。克治私慾。崇奉釘死之耶穌基利斯督。生時忍受艱苦。死後可得榮福。其布教之法。不以利誘。不以勢迫。惟忍人苦辱。至死不辭。而信從歸化者實繁有徒。不出數十載。已大道風行。遍及天下。非天主親立之真教。何以至此。然聖母有何分於此。而稱爲宗徒之后乎。噫。聖母卽別無他故。祇因爲耶穌之母。已足當此名號。然而聖母更有功於宗徒聖教不少也。耶穌始招徒傳教時。於加納[△]喜筵。因聖母之轉求。變水爲酒。初顯靈蹟。宗徒乃始信從不離。耶穌受難釘死。徒皆信根搖動。傷心敗興。一若別無所望矣。幸聖母早承耶穌之托。慰宗徒之憂。振宗徒之志。靜待耶穌復活。及耶穌升天後。仍係聖



母聽耶穌遺命。率引諸徒。祈禱不輟。備受聖神。聖神降臨時。宗徒門弟沾領寵光。頓卽變爲大聖。得以傳揚聖教。無所疑畏。聖母滿受神恩。更遠逾衆徒。聖多瑪斯曰。上智異能。先知等恩。聖母一併領受。倍形優沃。聖伯多祿領聖神後。當日出宣聖道。卽有數千人信從。厥後逐漸增多。遽成大會。別位宗徒傳教各方。從者亦衆。聖母聞報。每爲色喜。有就而求助者。聖母慰其憂。解其惑。治其病痛。堅其心志。有求必應。有苦必憐。四方聞風而至者。咸以一見聖母爲幸。如聖第阿尼削等。越國過都。不遠千里而來。非以耶穌而後。聖母爲聖教之基址。宗徒之師傅元后乎。


且宗徒所宣講者耶穌之德表也。功蹟也。然耶穌自降生至三十年之事。宗徒未知。惟聖母親見之。默識於心。聖盤達曰。默識於心者。欲於來時授諸宗徒聖



史傳諸後世也。聖盎博羅削謂聖若望宗徒於經首所書。講明耶穌之天主性。至爲超妙。必由聖母而知。聖熱羅尼莫謂路加聖史。記耶穌誕生幼歲之事。最爲詳細。想亦聞於聖母。聖母稱爲宗徒之后。更以隨己地位所宜。實有宗徒之事。宣揚聖教也。蓋聖母之行爲。至彷彿耶穌。非極有驗之講道乎。聖母之言語。由聖心而發。不甚足感動旁人乎。聖母之心。依聖伯爾納定之言。爲愛主之火。聖母之祈求。至懇切。至高超。至有能力。不以開拓聖子之國爲念乎。吾儕亦宜仿效聖母。以善言善行。特以祈求之工。幫助傳教之人。宣布聖道。使耶穌基利斯督之名。顯揚於世。光榮天主。拯救多人。是卽祈禱宗會之意向。恐爾亦進斯會。遵行此旨否。當聽耶穌之訓曰。穡事可刈者多。收穫者寡。爾輩亟求穡主。遣人收之。



祝言 聖母。耶穌升天而後。留爾於世。尙有二十年左右。爲宗徒之領袖。聖教之依望。汝升天而後。常不息護引傳教之人。攻斥異端。發明正道。聖母。汝之心常以開廣耶穌神國爲念。求爾多遣教士。宣佈福音。使我雖不能出外講道。然亦以虔禱切願。以誠言善表。感化鄰近外教人民。及冷淡教友。同歸天國。諸宗徒之后。爲我等祈。



諸爲義致命之后爲我等祈

按超性學士之論。致命不必果死於刑。倘爲信德之故。受刑綦重。依人性力不能免死。然以主特佑生全者。亦爲致命。如聖若望。宗徒受油煎之刑是矣。聖安瑟爾。莫聖利高烈等。皆謂非天主特力。聖母憂苦之甚。必不能生活。人情不能見人橫遭苦刑。血肉飛流。而不戚然於心。倘受苦者係己親友。悲傷尤甚。若母見己子。遭此慘戮。無法可救。必更傷心悲哭。不忍目覩。若係獨一孝子。且才德出衆。無辜而遭此逆難。爲之母者。必痛極致死矣。今耶穌爲聖母之獨子。爲尊高無上之主。爲美善絕倫之人。聖母愛之。至極無比。乃見其被繫被擊。遞解數衙。無非苦辱。及至頭戴茨冠。肩負苦架。滿身剝傷。鮮血淋漓。踟躕而行。幾次跌倒。卒至釘於十字架上。兩盜之中。以至氣絕。又歷三點鐘之久。耳聞惡衆誼罵。



之聲。目見耶穌哀慘之狀。又見宗徒除若望。外皆逃往他處。伯多祿且三次背逆。茹答斯又自縊而死。聖母斯時絕無安慰。不若別位致命聖人。於劇刑之中。滿嘗神味。不覺苦刑。聖母不然。愈愛主而愈哀主。苦心焦思。無由解散。

及見耶穌俯首氣絕。聖母悲愁更甚。見素所鍾愛之子。今不言不動。僅存屍身矣。又不知如何可將聖屍卸下埋葬。幸有尼各得。陸及若瑟。耶穌兩門弟。代求比辣多。准將耶穌聖屍。由架卸下。聖母此時抱之於懷。見滿身鱗傷。更一望一滴淚。幾乎氣絕。及至葬於墳墓。以石掩塞。不能復見耶穌。更覺悲悼嘆惜。徘徊不忍離去。若是乎聖母之痛苦。有一致命聖人可幾及哉。宜聖教會稱之爲痛苦之母。致命之后。聖依特風。索謂聖母見子懸架。哀痛逾於致命。聖巴西略云。聖母之痛苦。較諸致命者更大。若日光之逾衆星。教友。我今默想聖母之痛苦。




悲傷感謝則效而外。尤有一善訓當取。卽知苦難爲榮福之路。受苦益多。將得之福益大。耶穌聖母導之於前。諸聖人隨之於後。捨此別無他路可由。耶穌爲至聖之聖。聖母終生無罪。充滿寵德。尙當先苦而後福。況吾儕卑微罪人乎。聖保祿宗徒曰。我若與耶穌同受苦楚。亦將與之同王於天。汝其勉之。

祝言 痛苦之母。汝於十字架傍。所有之憂傷。更甚於致命諸聖。身受之苦刑。以爾之表。因爾之求。自聖斯德望至今。常不少勇毅之人。爲義捐軀。增光聖教。聖母流血之致命。我本不敢望。然主若不我遐棄。願賜此恩。望亦加我神力。不致腆辱聖教。然日常之致命。負主所加之苦架。凡爲耶穌之子弟者。皆不能少。耶穌曾訓我云。非忍苦不能救靈。懇求慈母。賜我寵力。忍受世上諸難。亦得致命之榮於天上。諸爲義致命之后。爲我等祈。



諸精修之后爲我等祈

精修諸聖。爲耶穌忠信之僕。不顧人世之榮辱好惡。肉身之快樂艱窘。專務修德立功。愛主救人。以言以行。證己所從之教爲真教。所信之道爲正道。甚至爲主捐軀。亦不畏縮。聖教會稱聖母爲諸精修之后。以聖母忠於事主。愛慕耶穌。務己德修。愛人靈魂。遠超諸聖人之上。於上句內默思聖母之痛苦。不能盡意。今更加一語。當聖母立於十字架傍。斯時耶穌爲大衆譏罵離棄。宗徒亦皆心旌搖動。概已畏葸逃亡。卽天主聖父。亦若棄己聖子。絕不加慰。至耶穌終時連呼云。吾主。何捨棄我。然聖母終不稍離耶穌。深信其爲天主之子。甘心受苦。救贖萬民。且志決氣剛。若能與聖子同死。更爲深幸。吁。聖母之信從救世主。何其切實哉。豈他精修之聖可比乎。



精修者爲德業純粹之人。在世時不論居何地位。不論當何職分。年不分老幼。力不分強弱。何論富貴貧賤智愚。苟能敬主盡分。遇難不屈。雖小不忽。超越尋常之度。至死勿變。死後經聖教會再三嚴查。知屬確實。天主又數顯靈蹟。証其功德。聖教會乃錄入聖品。稱爲精修。准行敬禮。奉爲主保法式。今稱聖母爲精修之后者。一因聖母之功德。遠勝諸精修之上。不言自喻。聖若望大瑪瑟諾稱聖母爲靈跡深淵。涵蘊諸德。無一非奇妙。欲述其所造之境。浩然不可推測。是故其貞潔。端正。謙遜。仁慈。神貧。聽命。愛主。愛人諸德。無不不超出精修諸聖之上。二因諸聖精修皆恃聖母之特寵崇恩。皆效聖母之德表。皆有愛母之誠心。而成爲聖人。故今在天榮福。於天主以外。亦皆歸功聖母。又見聖母遠出己上。自然感仰情深。視若己后焉。我今默想此句。當效精修之聖。輕視人世之榮辱。



專爲耶穌之肖弟。常以十字聖架爲我德能。天堂爲我向望。不以人之輕慢艱阻爲意。記憶耶穌之言曰。認予於人前者。我於聖父前亦將認之。不敢認予於人前者。我於聖父前亦不之認。又曰。汝之善行。宜若光明之燈。令人見之。光榮在天聖父。

祝言 聖母在天精修諸聖。皆以爾之寵佑引導。得有此日之榮。汝於諸事中。恒以認主聖名。承主聖旨爲向。求賜我亦能不顧人言俗尙。遵守主誠。隨主聖表。不偏不倚。使人一見之下。能知我真爲耶穌之子弟。於我身上。讚揚天主之光榮。諸精修之后。爲我等祈。



諸童身之后爲我等祈

諸聖童身於天堂。另成一隊。有特出之榮福。唱格外之歌曲。讚美天主。密隨無玷羔羊。超越其餘聖人。聖神於智德經云。潔淨令人密契天主。聖母於厄襪。諸女中。首發童貞之願。爲後世童貞之表率。一生冰清玉潔。不受塵埃。到不可復加之級。故其親密天主。亦盡受造者之能事。無以復尙矣。大賢亞爾備爾多曰。倘聖母與天主不成爲一。不能親結更深。然聖母在世之時。身靈至潔。密邇天主至極。上已言之屢矣。不必多贅。今聖教會復稱之爲諸童身之后者。若欲引人神遊天上。注望聖母於天堂萬福中。亦爲諸童貞之首領。諸童貞之光耀。見其特以貞潔之故。而如此見悅於主。蒙主特寵。拔諸神聖之上。至親近天主。蒙格外之尊榮。於是可知。凡諸在世守貞之人。亦見重於主。見愛於主。而感激之。



情堅固之心。自然感發。小過亦愼。遇難不辭矣。噫。聖母而後。聖教中不知有多少童身。功德超群。動人驚羨者。童男弱女。棄世俗之歡欣。辭肉身之安樂。當諸逆難而不屈。赴受虐刑而不辭。奇哉。

然以人之心志易變也。故聖教中有終生絕色之願。蒙主聖召。冀升司鐸者。德學既粹。晉登聖品前。尙須矢願守貞。至死不變。乃能齋誠奉祭。專司教務。諸凡修士修女。數年試驗之後。絕財絕意以外。亦須發願絕慾。乃能精修不怠。全心對越天主。盡力仁愛諸功。噫。人情孰無室家之好。誰使之變已柔靡之性。爲此剛毅之行哉。非以聖母導之於前。佑之於今乎。聖母若謂諸童身曰。愛我者我亦愛之。然愛之實証。在仿我特慕之德。汝皆清心潔志。度生如天神。我故愛汝。逾於凡衆。今諸聖童身在天蒙賞。歡耀特隆。不當感謝聖母。特奉爲己之元后。



聖母禱文疏解…

諸童身之后爲我等祈

百七十二

乎。吾衆教友。雖不能皆守貞修道。然當各依地位所宜。保守身心。不染淫罪。庶死後於天上。雖不能密侍童身之主。無玷羔羊。童身之后。聖母瑪利亞。至少可遙享其榮。

祝言 諸童身之后瑪利亞。謝汝首樹童貞之旆。以汝表率。因汝助佑。至今常不少神形清潔之人。爲聖教之光輝。聖母。懇求以爾默佑。使隨從爾表者。數益增。德益堅。盡獲童貞之冠。得勝之枝於天上。聖母。賜我亦珍重此德。制身克慾。避去犯罪之機。恃主聖寵之力。至死白圭無玷。不忝辱汝童身之后。諸童身之后。爲我等祈。



諸聖人之后爲我等祈

聖教會知己子女。在天享福者。等級不一。爲數實多。不能爲之逐一排列何等。特加敬禮。故定諸聖瞻禮之日。普通施敬。公共懇求。乃聖母於天堂。位列諸聖之上。榮光遠勝無比。若太后之比臣僕。爰有諸聖人之后之稱焉。諸聖在世時。皆以崇德奇功。增光聖教。或志切救靈。捨身不惜。或攻斥異端。發明正道。或掌管聖教。訓誨萬民。或曠野苦修。專志默禱。或保守天真。從未失落主寵而成聖。或晚年悔改。補贖功深而成聖。或貞節絕倫。或忍順出衆。或超於仁愛之功。或奇於謙遜之德。總之。天主欲衆人爲聖。於聖教會內備設作聖之資。諸聖人善用之下。乃終至德備功全。而進天國。受主賞報。絲毫不遺。雖天主酬報諸聖。無不豐厚。快飫衆心。然如聖保祿云。若星之於星。大小光明。互有分別。耶穌亦云。



我父屋中。座位極多。其間必高下不一。吾主耶穌在諸天至高之座。聖父之右。耶穌之右。定爲聖母之座。其榮福較諸神聖所享。更遠勝無比。蓋超性功德。隨聖寵而發生。聖寵若爲天上榮光之種。聖母始胎時。蒙寵已逾至大聖人。自後功勳日積。聖寵日加。諸德亦因之俱長。及至死時。功高德懋。峻極於天。有聖祖之信望。有先知之默啟。有宗徒救靈之熱情。有致命忍苦之勇毅。有精修之忠信。有童身之清潔。不但有諸聖人之德修。更超軼其上。宜乎在天膺賞。高出諸聖之上。而爲諸聖人之后也。

夫耶穌爲聖德之聖德。聖人思其言行。用心則效。愈肖耶穌者。聖德愈全。天上之榮光亦愈大。然聖母與耶穌數十載周旋一室。察言觀色。默感潛孚。薰其德而日益善良。最與耶穌無窮之德。兩相彷彿。極乎受造者之能事矣。聖安瑟爾。



莫語聖母曰。至聖之聖而後。無有似汝聖德者。則聖母在天之榮。不但無一聖可以幾及。更超出諸聖併合之榮焉。諸聖在天。均以見寵於主。有功於主前之故。能爲人乞宥求恩。作人中保於數事。聖良曰。奇哉。天主不特使聖人爲人之芳型。更爲人之蔭護。然聖母轉禱之能。主保之力。更邁越諸聖。無欲不成。允當推爲諸聖之后。噫。聖母爲諸聖人之后。欲其亦爲我等之后。先須於世。學爲聖人。爲聖人。在乎活天主之生命。卽靈魂有主寵愛。謹慎保守。日漸加增。又以全心全靈。全力全意。愛主於萬有之上。并盡己所能。行諸愛人之功。若是至終不怠。則於世已活天主之命。於天可列聖人之羣。享天主之榮福矣。伯爾各滿幼年大聖。有兩句格言。可引以終此章之意。其曰。倘我愛慕聖母。常生可保。無所求於主而不得。否則不能安心。又曰。予欲爲聖人。此兩意本連結。欲救靈成聖。



聖母禱文疏解…

諸聖人之后爲我等祈

百七十六

必須仰慕聖母。眞仰慕聖母者。終必成聖。天榮可保矣。

祝言 聖母。汝在世時。受主恩寵。勝於諸聖。積德立功。勝於諸聖。宜乎在天榮光之高。轉求之能。亦勝於諸聖。爲諸聖人之后。我同諸聖人尊敬爾爲元后。愛慕爾爲慈親。望以爾大能之助佑。賜我在世避罪。修德立功。勉力爲聖。死後乃得居天庭聖人之末。共揚爾之榮光。諸聖人之后。爲我等祈。



無原罪始胎者后爲我等祈

稱聖母爲諸聖人之后而後。若別無名號。可以尊頌之矣。不知教友呼求聖母之情。尙未快足。自教皇庇護第九。頒定聖母無原罪爲信德道理之後。聖母禱文上。又增此稱揚聖母之徽號矣。自古聖人明士。信友公意。大都依理據經。由聖教傳述。知天主特寵聖母。視救世主將立之功勳。不任其沾染原罪。庶能踏碎獄魔之首。襄助救世之功。不愧爲天主之母。阿理日納。離宗徒之世不遠。謂聖母生於主寵。從未受獄魔之毒害。聖安弗稜。謂聖母絕無罪過。聖濟利爾。言之更明。謂聖母不染原罪。聖熱羅尼。莫奧斯。定若望。大瑪瑟。諾安瑟爾。莫文多辣等。皆衆口一詞。依聖教之真旨。隨教友之公意。明証聖母始胎無玷。故教皇庇護第九。於一千八百五十四年。十二月初八日。按聖教合會之意。并蒙主默



示。舉行大禮。詔定聖母無原罪爲信德道理。頒照之日。普天同慶。大悅愛敬聖母者之心。而無原罪始胎者后一句。亦由此發生矣。

夫始胎無原罪。爲聖母獨得之恩。破格之榮。故聖母特別珍重。感激無涯。於一千八百三十年。聖母顯現於法國一仁愛會修女。命依所見之像。製一聖牌。上書呀。瑪利亞。無原罪之始胎等字樣。此卽爲無原罪聖牌。又名呀瑪利亞聖牌。或混稱聖母聖牌。西文咸稱顯靈聖牌。因此聖牌。所顯之靈跡。實不可勝數。一千八百五十八年。聖母屢次顯身露德答。幼女伯爾納得之間。亦以始胎無玷爲己名號。從可知聖母如何重視此恩。願人以此名稱之敬之矣。吾儕教友固皆深信聖母不染原罪。供聖像。佩聖牌。進聖會。造聖堂以尊敬之。然敬之至善者。乃效法聖母。看重主寵。醒寤祈禱。避諸罪愆。特於己首惡。爲天主特寵之阻。



礙。其餘罪過之根原者。勤行改革。乃能日益見愛於天主及聖母焉。

祝言 聖母。惟爾獨無原罪之污累。自始得主寵愛。堅定於善。終無背主之虞。吁。全美之母。無玷之母。我雖幸領聖洗。原罪已除。然遺累常存。非爾特佑。難以保存主寵。不犯本罪。聖母。吾聞聖方濟各沙勿略聖亞爾方騷勞得利齊等曰。敬汝無原罪始胎者。無求不允。予亦憶爾此恩。代爾謝主。求爾助我。至死不再加本罪。污穢我靈。羞辱爾無玷之后。無原罪始胎者后。爲我等祈。




聖玫瑰經之后爲我等祈

上章業以玄義玫瑰之名稱頌聖母。今復加此一句何哉。蓋以前位教皇良。第十三。見聖教多艱。上籲聖母。而籲禱之法。莫如玫瑰經。故連年疊降詔書。令人持誦。於一千八百八十三年。又諭於聖母禱文末。加聖玫瑰經之后。爲我等祈兩句。夫玫瑰花中之珍寶者也。艷色清香。舒人心意。此外羣芳皆不能比。玫瑰經亦經中之珍寶者也。創自聖母。傳自聖多。明悟所誦天主經。爲耶穌親口所訓。意義無窮。聖母經爲天神嘉俾。額爾。聖婦依撒伯爾。及聖教之詞。所思十五端奧跡。乃天主降生救世之大功。包藏耶穌聖母之德表。人誠能口誦心維。尊敬聖母。奉爲元后。視若良師。定必悅天主之心。快聖母之意。獲寵綦多。德修日進。經言珍善。以此爲最。



玫瑰經自創行以來。所有奇效。不可勝記。聖多明悟。以此經勸化異教人。十有餘萬。教友中不守規誡。賴玫瑰經而改過者。不知其數。天主又屢顯靈奇。明示玫瑰經之寶貴。如起死療病。禦災驅魔。解惑慰憂。堅人信。醒人心。勉人於善。戒人於惡。佑人行路。賜人善終等事。往往而是。昔聖母命一附魔之人。於聖多明悟。及大衆前。明言聖母之仁。至大莫比。轉禱之能。逾於衆聖。信人念玫瑰經。至死不輟者。必不下地獄。歷代教皇。亦咸以玫瑰經爲恭敬聖母。獲其庇蔭之善法。故頻頒諭旨。多賜恩赦。勉勸教友。虔恭誦。庇護第七。去國蒙塵。特玫瑰經而卒得復位。庇護第九。被難失國。常以玫瑰經爲至寶。朝夕禱誦。志切意專。教皇良十三。亦屢降恩詔。勸人虔誦。前代聖人亦最重視玫瑰經。聖利高烈。年老力衰。不能理事。自晨至夕。誦玫瑰經不絕。某夜問侍奉之修士曰。予玫瑰經已



念否。修士答云。想已念矣。聖人曰。汝想然耳。定已念否。蓋此爲我救命之法。不可偶失。聖亞爾方騷。勞得利齊。一有餘暇。卽手持念珠。撥誦不輟。指上生胼。聖嘉祿。鮑爾德。虔心自誦。又復傳佈遠近。飭屬下修士。盡入玫瑰會。聖依納爵。聖方濟。各沙勿略。聖女德肋撒等。均奉玫瑰經。爲淑己淑人之寶訣。嗚呼。有經如此。或忽而不誦。或誦之不善。真誤甚矣。

祝言 聖母瑪利亞。我自生至今。受爾恩寵甚多。捫心自問。雖無寸善可告。然實敬爾有心。恃爾無疑。願聽教皇良第十三之勸。日誦玫瑰經。及聖母禱文。終不間失。求爾保護聖教會。使能出險入夷。噫。聖母。我見教皇及諸信人。皆依賴爾。愛敬爾。有加靡已。我亦有情。亦需爾佑。亦知敬求爾之善法。今後奉行不忽。願愛爾爲慈母。依爾爲忠保。敬爾爲元后焉。聖玫瑰經之后。爲我等祈。



除免世罪天主羔羊者主赦我等


聖母禱文以呼求天主矜憐而始。亦以呼求天主矜憐而終。然始時分呼天主聖三。終時專向天主聖子降生爲人。除免世罪之羔羊者。因諸凡祈求。恒當以耶穌之名收結也。吾人誦聖母禱文至末。極誠稱讚聖母。呼求聖母之下。自覺依恃耶穌之心。亦油然而起。最爲懇摯。聖母聽人頌禱之聲。一連數十句。見人孺慕之情。勃發不止。能不將人之求。合於己求。以人之願。變作己願。奉獻聖子。催其允憐乎。耶穌亦樂人頌揚己母。愛敬己母。故必視誦者之美意。看己母之顏面。而不得不施寵矣。聖教會爲此三故。訓人又連呼除免世罪羔羊三次。求赦允憐三恩。以作禱文之結詞。今先思其一。依先知奧衰之譬喻。天主扑擊罪人。本若可畏之獅。古教時天主於息乃山。頒發十誡。雷電大震。顯示威嚴。以昭



儆戒。然天主自降生於聖母胎中之後。若化爲馴良之羔羊。欲因聖母而顯其仁慈。大施寬恩。不若前日之嚴怒矣。聖經上屢取羔羊之像。表章吾主耶穌。依撒依亞預言其將如羔羊。任人拖往宰割。並不鳴冤。熱肋米亞代爲設詞曰。予若無辜羔羊。牽殺祭獻。此皆預示救世主之良善含忍。甘捨己命。以贖人罪。羔羊之血。塗於門楣。救如德亞人長子之生命。脫厄日多國之奴役。表耶穌之聖死寶血。救人出自罪軛。保守神命。古教堂內。於結約之匱前。早晚祭獻無玷一羔。代贖百姓日常之罪。表今新教中。日行彌撒聖祭。補償教友平素之罪。天主羔羊之名。預指救世之主。爲如德亞人所習聞共知。故聖若翰一見耶穌。卽稱爲除免世罪天主之羔羊。宗徒傳教講道間。亦屢用此號。宣講耶穌。聖若望宗徒於默照經上。言之尤屢。聖教會定於彌撒中。榮福經。復活瞻禮時。感謝經。并



領聖體。送聖體前誦中。司鐸再三叩頌除免世罪天主羔羊。又屢於日課中。及各種禱文末。令人連呼此名。懇切祈求。誠以羔羊之稱。表明耶穌受苦贖罪。成救世之功。最爲顯著也。除免世罪云者。蓋如犧牲負民之罪。代人捨生以祭。邀主恩赦。耶穌亦然。負衆之罪。爲人祭獻於架上。而人罪得以除免。今當聽聖伯多祿之訓云。吾儕旣因耶穌之死傷。而得痊愈。宜與罪決絕。而活義德之生命矣。又加主赦我等一句。蓋人自犯之罪。明晰無疑。而真心悔告。已蒙赦與否。不知確實。已全行補贖與否。亦難決定。且卽係聖人。日間縱無大過。亦不免小失。故耶穌訓人日常求主曰。爾免我債。犯罪後悔改之聖人。每終生痛哭補贖。求除免世罪羔羊寬赦。達味恒向主曰。再求多洗我於諸逆行。而潔清我罪逆。因自認我罪逆。而我罪永爲我敵。聖伯多祿每晨聞雞鳴。輒哭泣已罪。夫此謙抑



慘悔之心。最悅天主。最益神靈。故卽生平所犯無多。或從未犯過大罪之聖人。亦自視爲重大罪人。常求天主寬宥。并聽耶穌之訓。亦赦免他人。汝亦自知多罪。若見聖母於架下。獻此無玷羔羊於聖父。代贖汝罪。若聞此無玷羔羊之血。非若亞伯爾之血。發聲求主報復。反求主寬免。今再同聖母。向之求曰。

祝言 主。若記憶人罪。主誰能堪之。主勿震怒時。計責我。勿嗔恨時。懲斥我。我雖爲辜恩負義之人。藐視爾之刑罰。輕忽爾之賞報。本當遭爾義怒。然主勿依我罪判我。回憶爾之仁慈。爲救贖我罪。代作祭牲。死於十字架上。視爾仁慈之母。爲我轉禱。寬赦我罪。復加恩寵。吾主。豈忍拂逆爾母之心乎。我恃聖母之護佑。自後欲恒心爲善。至死保汝寵愛。頌揚爾天主羔羊於無窮世。除免世罪天主羔羊者。主救我等。

除免世罪天主羔羊者主允我等

往罪獲赦。猶爲未足。倘無主佑。仍不免再犯。不能爲善。故聖教會又訓人求曰。除免世罪天主羔羊者。主允我等。於此一句。并前基利斯督俯聽垂允我等之句。隱示人祈求天主之緊要。人與主間。密切之關係。頗足供默想之資。夫人生今世。柔弱實甚。急需孔多。不得不有求於主。天主知之最明。爲己所欲。故不但。不阻人祈求。更依聖師公意。命人祈求焉。於古教時。天主已用先知之口。訓人曰。呼求我者。我將應之。又曰。於汝憂苦中。禱告我。我將救爾。爾乃光榮我。又若詰人曰。誰求主而被棄者。耶穌於傳教講道間。祈求一事。更再三諄囑。如曰。求則得。該常禱勿輟。求則應。叩則啟。尋則獲等經典。不能盡述。以後宗徒聖師。超性學士。導靈良師。俱囑人祈禱。爲免惡行善。至要至善之法。聖利高烈著一小



書。講祈禱之緊要。謂願印發普世教友。俾各執一本。藉知爲救己靈。祈求如何切要。於序文中。謂祈求有切實之緊要者。因知聖經聖師所訓如此。并知多數教友。忽此救靈之捷法。并惜講道理聽告解之人。於此要端。不甚留意。并通行之聖書。言之亦不甚懇摯。於首章內。歷引聖經聖師。公會議之定論。并超性學士之推理。而後斷結曰。祈求者定獲救靈。不祈求者定將被罰。天上諸聖。除未開明悟而死之嬰孩外。無不因祈求而得天堂永福。地獄諸受罰之靈。無非因不祈求而遭地獄永苦。倘曾求也。不致受罰矣。故於獄中恒憶在生時。有最易救靈之法。惟須懇求寵佑。而未之用。今已矣。非其時矣。是爲其至大之失望。至切之怨恨。聖利高烈。又於此章論聖人之轉禱後。特提聖母之代求。引聖伯爾納多之言曰。如欲就聖父。必經聖子義德之中保。欲詣聖子。必經聖母恩寵之



中保。因其轉達。可得耶穌功德之恩效。聖母由主得兩樣圓滿之寵。一爲聖子降孕於其至潔之胎。二爲因其代禱。而吾衆能得各種之寵。噫。我友。經有云。爾立宜顧。慎勿隕墜。聖奧斯定曰。世無難犯之罪。雖窮凶極惡之事。人俱能爲之。故主囑人。切勿自恃。恒禱勿息。主必允聽。至論當求者何事。何者宜先。何者宜後。次序輕重之別。包舉於耶穌親告之天主經。一一條陳於聖人列品禱文。善禱之規例。畧解於下章。今再同聖母。向吾主耶穌曰。

祝言 天主羔羊。贖罪之牲。昔日傾流聖血。死於十字架。以救世人。今常於祭臺上。借麴酒之形。司祭之手。祭獻於天主聖父。求賜赦人罪過。加人恩寵。耶穌。汝今啟我悔恨之情。教我求爾寵佑。補贖往愆。戒慎於後。從知爾欲待我以仁。不以公義。我今同爾司祭。同諸信人。同聖母瑪利亞。謙恭求爾。俯聽我禱。耶穌。



聖母禱文疏解…

除免世罪天主羔羊者主允我等

百九十

爾曾云。不論何欲。儘可祈求。無不見允。我今不求世上榮福。亦不求盡脫諸難。然求爾賜我優沃之寵。熱愛之恩。至死免惡爲善。結契爾心。特求賜我恒心祈禱。善於祈禱。此爲聖寵之聖寵。有此。我卽充飫富饒。不圖他物矣。聖母。爲我轉求。蒙主俯允。除免世罪天主羔羊者。主允我等。




除免世罪天主羔羊者主憐我等

第三句除免世罪天主羔羊者之下。西文無主之一字。祇言矜憐我等。聖教會若欲耶穌忘己爲天主之尊威。專念降生救世之仁慈。矜憐衆人。夫天主之矜憐。爲無玷羔羊聖血之功效。聖血所到。矜憐卽施。赦罪也。優寵也。成聖也。無不於耶穌之苦難血死是賴。吾儕生於天主降生之後。知其如何愛吾人類。受何苦難。行何善功。以救吾人。而尙疑其憫憐乎。請汝開視聖經。曾見一人。求此慈善羔羊。而不見憐者乎。二瞽求耶穌施救。耶穌撫其目。愈其瞽。復其明。加那納一婦呼曰。主。達未之子。我女爲魔所苦。請憐我。雖耶穌始若不允。終遂其意。痊其女。一父跪耶穌前乞曰。主。我兒癲癇苦甚。祈憐憫之。耶穌命携兒來。愈之。還其父。肉身之苦。耶穌憐之如此。心神之苦。甚於形苦。聖心尤爲憫惜。一日愈癲



者謂之曰。小子安心。爾罪赦矣。瑪大肋納流淚濯耶穌足。耶穌慰之曰。爾罪赦矣。可安心歸噫。耶穌在世慈憫若此。豈今天改其初心乎。定非也。不然。何爲雖已升天。仍日居於聖體中。待人往訴。以己體血。養人神靈之命。以己祭獻。爲人贖罪之資。得寵之價耶。我故一心依其仁慈。求其矜憐。

然或謂救世主旣如是憐恤世人。願聽人求。慰人苦。又有其至慈之母。爲人中保。何故仍有多人身心困苦。求主不允。求人無路。至一無可靠。痛不欲生者。噫。若此之人。蓋不知天主之仁慈。耶穌之恩惠。聖母之良善。或忽而不求。或求而不得其宜。順己偏情。徒顧世樂。及見諸事不遂。無人可告。乃憂鬱失望。或至自萌短見耳。今故再從聖利高烈祈禱小本。摘譯善禱之式。以獲主憐。第一。聖人先直告曰。雖爲人代求。託人轉禱。極爲有益。甚悅主心。然耶穌所許求無不允。




特指親自祈禱之人。爲靈魂緊要相宜之恩寵而言。若肉身上之榮福。有害於靈者。主未許有求必應。且爲愛人之故。亦不忍與。故本性之恩。雖亦可祈。亦當求。天主亦屢允所求。然當云。倘有益於主榮己靈。懇主賞賜。至論魔誘之有無。神功之乾枯。或興味等亦然。主爲人之益。加此試難。看其待前賢往聖可知矣。故耶穌親作之天主經。不訓人求主絕不受誘遭難。惟求毋陷於誘惑兇惡。若夫神恩。定合主旨。爲靈有益者。則直然求之。惟須知謙遜依恃恒心三例。聖雅各伯宗徒曰。天主拒絕驕者。加寵於謙者。謙遜者之禱。透出雲霄。直升主前。見允而止。依恃之心。亦爲緊要。大彰主善。信主不能背己所許。又有耶穌無限功勞。聖母之轉達爲質。尙何疑乎。勿謂我犯之罪。足阻主恩。故恐主未必肯憐。聖多瑪斯曰。吾儕祈求。靠主仁慈。非靠己功。又曰。祈求者不必先爲主友。然祈



求能使人由主仇而化爲主友。蓋如聖伯多納多推論曰。罪人之求。正顯其復願與主和好。此願定由主而來。主若不之肯聽。何故與之。恒心亦不可少。蓋免惡爲善。乃人日常之分。至死方定。故死於主愛。非僅一二零散之寵。乃如連環之寵。不可中斷。爲此祈求亦不可間缺。死而後已。至論他寵。亦惟主知時之合宜。靈之景況。不卽允施。明顯其恩之貴。愛之盛。欲與人時常交接。終不分離。且若人恒求之下。主不賜其所欲。必易以更大更宜之恩。過人之望。我故今當決定志向。恒禱不息。復向無玷羔羊。同聖母求云。

祝言 除免世罪天主之羔羊。人生於世。艱險甚多。神靈被三仇之攻擊。時刻難防。肉身有疾病苦勞。不能久免。非汝特佑。何能堅意忍受。保守身心。而終不疏忽隕墮。耶穌乎。汝在世時。何往而不加恩。求爾勿視我之無良。迴思爾向有

之仁慈。憫憐我痛悔之罪人。更以聖母之轉禱。求爾加我神力。勿陷於誘惑。毋得志而傲。毋遭難而屈。然常爲爾之肖弟。聖母之孝子。守爾誠。從爾訓。每遇神形險難。速卽舉心懇求爾佑。庶可至終保守爾寵。安死於爾聖愛之中。永享見爾於天上。除免世罪天主羔羊者。主憐我等。



聖母禱文疏解...

百九十六

80324
22